

Ռ. Յ. ՊԵՐՊԵՐԵԱՆ

ԵՐԵՎ ԲԱՆԱԽՈՍՈՒԹԻՒՆՔ

- Ա. ԹՇՈՒԱՌՈՒԹԻՒՆ ԵՒ ԳՈՒԹ
Բ. ԳԵՂԵՑԻԿՆ ԵՒ ԳԵՂԱՐՈՒԵՍՏՔ
Գ. ԺՈՂՈՎՐԴԵԱՆ ԶԲՕՍԱՆՔՆԵՐՆ



Կ. ՊՈՒԼՍ

ՅՊՈԳՐԱԹԻՒՆ ԱՐԱՐԵԱՆ

1880

Ռ. Յ. ՊԷՐՊԷՐԵԱՆ

ԲԱՆՍ. ԽՕՍՈՒԹԻՒՆ Ք

Գ

ԺՈՂՈՎՐԴԵԱՆ ՉԲՕՍԱՆՔՆԵՐՆ



Կ. ՊՈԼԻՍ

ՏՊԱԳՐԱԹԻՐՆ ԱՐԱՄԵՆՆ

—
1880

ՆՈՒՆԲ

ՀՍ.ԾԱԿՐԱՆԱՅ

ԱՌ

ՍԱՀԱԿԵԱՆ ՍԱՆՈՒՑ ԸՆԿԵՐՈՒԹԻՒՆ

Ս Ա Մ Ա Ք Ի Ո Ց



1-586 աեհ



Ա.

Հ Ի Կ Ծ , ամէն դարուց բանաստեղծներուն մեծագոյնն , անցեալ տարի Մարտիկիոյ գործաւորաց Համաժողովոյն ի նպաստ Լուի Պլանի կողմէ տրուած մի բանախօսական հանդէսն բանալոյ համար խօսած մի սքանչելի ճառն , մին այն ճառերէն զորս ինքն միայն գիտէ ըսել եւ որք յաճախ աւելի երկնազգեցիկ մարգարէի ներշնչմունք կը թուին քան սոսկ բանաստեղծի կամ պերճախօսի խորհրդոց ու զգացմանց արտայայտութիւն , կը վերջացնէր այս խօսքերով . « Եթէ խո-

(*) Այս բանախօսութիւնն արձանագրուած է Սամաթիոյ Սահակեան Սանուց ընկերութեան լսարանին մէջ ի 10 Փետ. 1880 :

նարհեցնեմք մեր աչերն , կը տեսնեմք միջատն որ կը խլորտի խոտոյն մէջ , եթէ վեր վերցընեմք մեր գլուխն , կը տեսնեմք աստղն որ կը շողայ հաստատութեան մէջ : Ի՞նչ կ'ընեն . մի եւ նոյն բանն : Միջատն կ'աշխատի յերկրի , աստղն կ'աշխատի յերկինս . անասմանու թիւնն կը բաժնէ եւ կը միացնէ զնոսա : Ամէն ինչ անհունն է : Ի՞նչպէս այս օրէնքն չլինի մարդոյն օրէնքն : Նա եւս կը կրէ տիեզերական ուժոյն ազդեցութիւնն , եւ կը կրէ զայն կրկնապէս , կը կրէ մարմնով , կը կրէ ոգևով : Իւր ձեռնն կը զանգէ զհող , իւր հոգին կ'ընդգրկէ զերկին . նա կաւ է ինչպէս միջատն , եւ արփային է որպէս աստղն : Կ'աշխատի եւ կը խորհի : Աշխատութիւնն կեանքն է . մտածութիւնն լոյսն է : »

Այս խօսքերով իննեւտասներորդ դարու աւագ հանճարն կը հաստատէր ԱՇԽԱՏՈՒԹԵԱՆ հարկն : Աշխատութիւնն , այն , մի օրէնք է հարկադրուած մարդոյն վերայ ի նմանէ որ զընութիւնն ըրաւ , հարկադրուած այն ամէն բանի վերայ որ կ'ապրի , որ կայ : Հանքերու մէջ հիւլէներն կը շարժին , զիրեար կը քաշեն կամ կը վանեն : Բոյսն կ'աշխատի , չէ անգործ . կը մղէ իւր արմատներն

երկրի ընդերաց մէջ իբր հազարաւոր բերաններ կենսատու հիւթոց ի խնդիր , եւ իւր ճիւղերն կ'արձակէ միջոցին մէջ օդ եւ լոյս ծծեւոյ համար : Կենդանիք կ'աշխատին , այն որ կը թռչի , այն որ կը սողայ , այն որ քառատրոփ կ'ընթանայ , կ'աշխատի , եւ եթերային անհունութեան դաշտերուն մէջ թաւալող լուսեղէն մարմինք կ'աշխատին , կը դառնան , կը դառնան անդուլ այն կեդրոնին շուրջն ուստի կը ճառագայթէ ի նոսա այն լոյսն ու ջերմութիւն որովք կը սնանին : Աշխատութիւն . այս է տիեզերական օրէնքն . ոչինչ կը խուսափի անտի : « Մրցում ապրելոյ նաւար » , երբ Տարվին արտասանեց այս բառն , կրնար Արքիմէդէսի պէս գոչել էրեքս , երեքս , զի տիեզերական շարժման եւ յառաջդիմութեան գաղտնիքն գտած էր : Մարդն հպատակ է այս օրինաց , ինչպէս ամէն էակ . չիք կետնք առանց աշխատութեան . չիք աճում եւ զարգացում առանց նորա : Բնութիւնն յինքեան ունի ամենուն սնունդն . բայց պէտք է խնդրել , եւ երկրի արգանդն այն ատեն աւելի արգաւանդ է՝ երբ կը թրջուի մարդկային ճակատու քրտամբ : Մարդն կը ծնանի մերկ

եւ տկար, տկար, այո՛, քան շատերն կեն-
դանիններէն որք մասամբ գողցես աւելի
նպաստաւորուած են բնութենէն, որ զգե-
ցուցած է զայնս եւ տուած է իւրաքան-
չիւրին իւրեան պաշտպանութեան համար
գէնքեր. փիղն ունի իւր վրիժակներն, ա-
ռիւծն իւր ճիրաններն, ցուլն իւր եղջիւր-
ներն, արծիւն իւր մագիլքն, մեղուն իւր
խթանն, իժն իւր թոյն. բայց մարդն, տկար
Ֆիզիքապէս, ունի իւր ինտեղականութիւնն
որով կը հպատակեցնէ ինքեան բնութեան
գորութիւններն, կը նուաճէ հակառակամարտ
ոյժերն եւ իւր մարմնոյն տկարութեան օ-
ժանդակ տալով զայնս՝ կ'ապահովէ իւր
կեանքն ու կ'ստեղծէ իւր երջանկութիւնն:
Մարդոյն ամէն կարողութիւնք, Ֆիզիքական
թէ ինտեղական, տարրական վիճակի մէջ տըր-
ուած են նմա, հարկ է որ զարգացնէ զայնս
եւ գործածէ իւր պիտոյքն գոհացնելոյ:
Հարուստն ու աղքատն, գիտունն թէ ւզգե-
տրն, գործաւորն թէ զրամատէրն, տէրն
թէ ծառայն հաւատարապէս ստիպուած են
աշխատիլ. այն որ չունի՝ պէտք է որ շահի,
եւ ունեցողն պարտի ջանալ չիորուսնել, այլ
բնդհակառակն աճեցնել իւր ունեցածն. եւ

յետոյ, ոչ ոք անկարօտ է. պէտքն ու կա-
րօտութիւնն ամենուրեք են, աղքատու-
թիւնն բազմաձեւ է, եւ կը բնակի այնքան
հարստին սալատին մէջ որչափ աղքատին
խրճիին. ոսկւով հարուստն աղքատ է խել-
քով. ուսեալն պէտք ունի դրամոյ, զօրա-
ւորն մտքով կամ ինչքով՝ տկար է մարմնով
եւ կը կարօտի Ֆիզիքական գորութեան: Ոչ
ոք ինքզինք զերծ կարէ համարիլ աշխատու-
թեան օրէնքէն, ոչ իսկ այն որ ի ծնանելն
առձեռնապատրաստ կը գտնէ հազարաւոր
տարիներ ապրելոյ համար բաւող հարստու-
թիւն մի. լաւ, բայց պէտք է մշակել մտա-
ւոր կարողութիւններն. իւր բովանդակ հա-
րըստութեամբն մի անբան մնալոյ երկիւղն ու
վտանգն պէտք է որ դրդեն զնա յաշխա-
տութիւն: Բնութիւնն կը պահանջէ որ ա-
մէն ձեռքի մէջ մի գործի լինի. նաւաւարն՝
իւր թիակն ունենայ, մշակն՝ իւր բահ, եր-
կաթագործն՝ իւր մուրճ, կոշիկարն՝ իւր
հերիւն, հիւսնն՝ իւր ուրազ, երկրաչափն ու
ճարտարապետն՝ իւրեանց կարկին, մեքենա-
գործն իւր մեքենայն, բժիշկն՝ իւր ականջա-
փողն, նկարիչն՝ իւր վրձին, արձանագործն՝
իւր գրոց, երաժիշտն՝ իւր դաշնակ, կինն՝ իւր

ասեղ, մատենագիրն՝ իւր գրիչ. վատ ու անարժան է անգործի ձեռնն. պէտք է որ դօսանայ այն. զմարդ արարչութեան թագաւոր կոչած են. ուրեմն գործին է նորա մականն: Աշխատութիւնն կ'ազնուացնէ եւ կ'ազատէ. աշխատութեամբ, ճարտարութեամբ եւ գիտութեամբ միջին դարու ըստրուկ ժողովուրդն ազատագրուեցաւ, եւ իւր մարդկային իրաւունքներն ստանալով, հաւասար բազմեցաւ խրոխտ՝ այլ ծոյլ ու տգէտ ազնուականին: Աշխատութիւնն յանկախութիւն կը տանի, եւ ամենէն մեծ մարդիկ իւրեանց գործոց զաւկներն եղած են: Եւ ինչ որ ճշմարիտ է անհատներու համար՝ ճշմարիտ է նաեւ ազգերու համար: Ազգերու եւ ժողովուրդներու համար այլ չիք կեանք եւ երջանկութիւն անաշխատ եւ անվաստակ. ծոյլ ու դատարկապորտ ազգերու բաժինն են չղթայ եւ կոռուփ, ստրկութիւն եւ աղքատութիւն: Երբ մի ժողովուրդ չը ջանայ զարգացնել բնութենէն իւրեան տրրուած բարոյական ու նիւթական գօրութեան տարրերն, չմշակէ իւր յատկութիւններն, օգուտ չքաղէ զինք շրջապատող պարագայներէ եւ չհահեցնէ այն իմացականու Ֆիզի-

քական հարստութիւններն զոր շնորհած է նմա երկինք, թող երբէք երանութեան չակընկալէ արեգական տակ: Վնյ պարսեղոյն կը գոչին երբեմն. պէտք է գոչել աւելի ճշգիւ վնյ ծուլին: Ժիր մշակին ձեռաց տակ խոպան ու քստմնափուշ դաշտն մի պարտէզ կը դառնայ ծաղկալից, եւ տխուր աւերակներ կարեն յառնել իւրեանց փոշիներէն՝ թէ փչէ ինոսա շունչ աշխատութեան: Այսպէս ուրեմն աշխատութիւն անհատից եւ ժողովրդոց համար անհրաժեշտ մի պայման է կենաց՝ զարգացման եւ երջանկութեան, եւ մի օրէնք տիեզերական որում ենթարկեալ է ամէն ինչ միջատէն սկսեալ որ, Հիւկոյի բաւերով խօսելով, «խտտին մէջ կը խլրտի» մինչեւ աստղն «որ կը չողայ հաստատութեան մէջ»: Պատիւ աշխատութեան. . . . :

Բ

Սակայն որչափ որ մի հարկ է աշխատութիւն, այնքան եւ անհրաժեշտ է ՉԲՕՍՍՆԻՒՆ, — հանգիստն ու զուարճութիւնն. մարդկային գործունէութեան աղեղնն չկարէ միշտ լարուած ու ձգտեալ մնալ. պէտք է թուլացնել զայն մերթ ընդ մերթ որպէս զի պահէ իւր առաձգականութիւնն: Թէպէտ եւ նոյն իսկ աշխատութիւն կը կրէ իւր մէջ քաղցր հեշտութիւններ, թէպէտ բնութեան հեղինակն աշխատութեան խորն թաղած է հաճոյից այնպիսի դանձեր որոց անձանօթ է դատարկատունն, որպէս զի այս քիչ շատ տաժանելի հարկն ամօքէ ու զմարդ մղէ յայն, թէպէտ եւ գիտեմք որ գործաւորին համար իւր գործին քաղցր է եւ իւր յետին վայրկենին մի մորոքանաց ակնարկ կը թողու այդ առարկային վերայ որոյ հետ այնքան վաստակեցաւ եւ որ սպրեցոյց, ազնուացոյց, մեծցոյց զինքն եւ զոր կարէր այնքան հպարտութեամբ ցոյց տալ որչափ

թագաւորն իւր գաւազանն, թէպէտ գիտեմք թէ վաստակաւոր ճակատու քրտանց արդիւնքն սրչափ անոյշ է, սրքան կը վարձատրէ աշխատողն մի միակ տեսիլն իւր երկոց արգասեաց, թէ ինչպէս ակտրթ է մարդոյն հովանին ծառոյն զոր ինք տնկեց, հոտն ծաղկին զոր ինք ոռոգեց, համա պլազոյն զոր ինք հասունցուց, թէ ինչպէս մարդ իւր մի երկին վերայ կը գուրգուրայ իբր մի զաւկի վերայ եւ իւր բոլոր յոգնութիւնքն ու վաստակքն կը մոռնայ երբ կը տեսնէ զայն, թէպէտ ճշմարիտ է այս, բայց հարկ է, մի բնական՝ առողջապահական հարկ է մարդոյն համար իւր սովորական աշխատութիւններէն դուրս գրօս փնտուել եւ կազդուրում տալ իւր մարմնոյն ու մտքին: Սակայն պէտք է հասկանալ միանգամ ընդ միշտ «գրօսանք» բառին բուն իմաստն: Զրօսանքն դարձեալ մի աշխատութիւն է, բայց աւելի հեշտ, նուազ ծանր ու ստիպիչ գործունէութիւն մի, աշխատութեան փոփոխութիւն մի մանաւանդ. ահա՛ գրօսանքն: Մարդոյն սովորական աշխատութեանց մէջ, այն վաստակոյ բաժնին մէջ զոր ստանձնած է ընկերութեան հաւաքական գործէն, իւր կարո-

դուժեանց այս կամ այն աւելի կը յոգնի, այս կամ այն աւելի պարտաւոր է գործածել, եւ հետեւաբար միւսներն այն միջոցին անգործ կը մնան կամ գէթ չգործեն այնչափ որչափ միւսն. միոյն ամենորեայ աշխատութիւնն աւելի զնդերաց եւ մարմնոյ ոյժ կը պահանջէ քան մտաց. միւսոյն գործն մտաւորական է մանաւանդ. այս կը քայլէ մինչեւ երեկոյ, այն ստիպուած է մնալ կըսած մի գործուց վերայ կամ անձուկ հաշուետան մի մէջ մի մայր-տետրի վերայ. բայց մարդոյն այլ եւ այլ կարողութեանց կիրառութեան մէջ հասարակչութիւն կարեւոր է, սպա թէ ոչ չգործածուածներն կը բխանան եւ անդուլ գործունէութեան մէջ եզոզն կը տկարանայ ու կը մաշի շուտով. պէտք է փոփոխել զերերն, եւ սհա այս փոփոխումէն կը գոյանայ զբօսանքն, հաճոյքն. կարողութեանց տմանք կը հանգչին եւ այլք որ անգործութեան մէջ էին՝ կ'սկսին գործել աշխուժիւ. հասարակչութիւնն կը հաստատուի, ներդաշնակութիւն կը տիրէ անդամոց, գործարանաց, կարողութեանց մէջ. թեթեւցած կ'զգայ մարդ ինքզինքն մի բեռն, որ կ'ընկճէր զինքն, կը հրճուի, կը վերակազմի, կը վե-

րանորոգի, եւ այնուհետեւ, հետեւեալ ժամուն կամ հետեւեալ օրն, նոր ու դալար աշխուժիւ կ'երթայ լծուիլ իւր սիրելի լծոյն:

Ահաւասիկ զբօսանքն, ճշմարիտ՝ բանաւոր եւ փրկաւէտ զբօսանքն: Այս կերպ հասկացուած զբօսանքներն կ'ազնուացնեն եւ կը կատարելագործեն անհատներն ու ժողովուրդներն՝ զուարճացնելով զնոսս, եւ այս այնքան ճշմարիտ է որ մի ժողովրդի բարոյական մեծութեան եւ յառաջացման հայելին կարեն համարուիլ նորա զբօսանքներն եւ սոքօք կարեմք մեկնել զայնս:

Հիմայ տեսնեմք թէ ինչ են մեր մէջ, մանաւանդ Պօլսոյ վերայ խօսելով, զբօսանքներն, թէ կը համապատասխանեն զբօսանաց նպատակին, եւ՝ հակառակ պարագային մէջ՝ ինչ պարտին լինել:

Գ.

Չափազանցութիւն ըրած չլինիմ՝ կարծեմ, երբ ըսեմ թէ մեր ժողովրդեան զբօսանաց գլխաւորներէն մին է ՈԳԵԼԻՅ ԸՄՊԵԼԵԱՅ ԳՈՐԾԱԾՈՒԹԻԻՆՆԵՆ : Բաքոս այն աստուածն է զուարճութեան որ ամենէն շատ երկրպագուներ ունի մեր մէջ եւ իւր ասճարք, որպէս կ'անուանեն ըմպելեաց վայրերն, լի են նոցա ամբոխով : Այս մարտիսն ոչինչ ընդհատ ընդհանուր է Եւրոպոյ եւ Ամերիկայի մէջ, բայց նոցա մէջ ընկերութիւններ եւ այլ միջոցներ օր քան զօր կը ջանան պակսեցնել արբեցողներու թիւն. իսկ մեր մէջ, հազիւ դպրոցին գրասեղաններէն զերծած, պատանիք իսկ սյնքան չուտով կ'ընտանենան արբեցուցիչ բաժակաց : Ամէնքն կը դիմեն մոռնալ զինքեանս ալիօօլին մէջ. ամէն զբօսարանի մէջ գինւոյ, օղիի, քօնեաքի գուլաթներ լցուած խոկուած են ամէնուն առջեւ, եւ զինեաանց սեղաններն շուրջ կը սլատէ մի սլար արբեցողաց. կ'ար-

1-58 book

բենան նաեւ տուներու մէջ : Եւ ի՞նչ կը խնդրեմք այդ ըմպելեաց մէջ : զուարճութիւն, զբօսանք. — բայց այդ կրակէ ջուրերն, ինչպէս կը կոչեն վայրենիք, կ'այրեն մեր ստամոքսն եւ կ'ապշեցնեն զմեզ, եւ ո՛ր է զբօսանքն. մեր ո՛ր կարողութիւնն կը գործէ աստ իւր կարգին. ընդհակառակն մեր մտաւոր կարողութիւնքն կ'ընդարմացնեմք եւ մեր Ֆիզիքական կազմածն ծանր հարուածներ կ'ընդունի յորոց յաճախ պիտի ընկճի հուսկ յետոյ : Թերեւս չափաւոր գործածութիւն մի ինչ ինչ ըմպելեաց, մանաւանդ գինւոյն սեղանի վերայ, կարէ օգտակար լինել, գրգռում տալ մեր յոգնած ջղերուն եւ երագել գործարանաց յամրացեալ գործունէութիւնն, բայց զեղծումն քանի աղետալի է : Օ՛հ, յաճախ գործաւորն՝ արհեստաւորն կուգայ գինեաան սեղանին վերայ թողուլ իւր օրական շահն, մինչ անդին իւր կիներն ու զաւակունք, նօթի, կ'սպասեն որ սնունդ բերէ իւրեանց հայրն, եւ սա յաճախ կը դառնայ տուն ձեռնունայն՝ դանդաջելով՝ վայրագ, եւ մտիգին հարուածք կը տեղան կնոջ ու զաւակաց վերայ եւ ընտանեկան յարկն մի դժօխք կը դառնայ ուր

խառն կը ըսին հայհոյութիւնք եւ հեծմունք : Ո՛հ , ամէն մարդ կը պարպէ անդ իւր քսակն , զի գինեհարն ոչ եւս գիտէ թէ ինչ կ'ընէ , եւ հաշիւ՝ հեռատեսութիւն՝ տնտեսութիւն թուած գացած են ի բաց : Հետեւեալ օրն ի զուր կը փնտռէ իւր գրպանին մէջ դրամն զոր մի կարեւոր պէտք գոհացնելոյ սահմանած էր : Այս ըմպելեաց երկար գործածութեան մարմնոյ եւ մտաց առողջութեան վերայ ըրած կործանիչ ազդեցութիւնն անուրանալի է եւ բիւրաւոր փորձերով ապացուցուած : Զգաձգութիւնք , լուսնոտութիւն , անզգայութիւն , անգամալուծութիւն , անմարտողութիւն , ասլոութիւն , տկարութիւն յիշողութեան , դանդաջմունք , յիմարութիւն իսկ եւ ծնդունն ու մահ անժամ ողբալի հետեւանք են այլօրի անխոհեմ գործածութեան : Տօքթէօն Մաքս Բառչար , գաղիացի նշանաւոր բժիշկն , որ մտային հիւանդութեանց պատճառներուն վերայ երկար խոյզեր ըրած է , զիտած է որ Գաղիոյ Շարանթօնի յիմարանոցն ընդունուած 176 յիմարաց վերայ 60ին մէջ ողելից ըմպելոյ չարաչար գործածութիւնն մեծ գեր ունեցած էր , եւ դարձեալ 82 ընդհանուր անգամալուծութեան պարա-

զայից մէջ 24 ին պատճառ պէտք էր համարել զայլօր : Վիճակագրութիւնք ցուցած են նաեւ թէ ոճրագործութիւնն յաճախ զոյգ կ'ընթանայ արբեցութեան , թէ ողելից ըմպելիքներն են մանաւանդ որ մթին բանտերուն կը զրկեն իւրեանց բնակիչներն , եւ յաճախ դահճի սակրին իւր որսն : Զի , աւաղ , գինեզէն մարդն մի անբան , մի զազան է այլ եւս , մի կոյր եւ անգիտակից զօրութիւն է , քանզի մարած է ի նմա բանն , այն ջահն ներքին եւ աստուածային որ կը լուսաւորէր զնա եւ կ'առաջնորդէր նմա , եւ այլ եւս ինչ եղեռանց չէ կարող նա , նա յորում մի կատաղի գեւ կը մոլի . ամենէն հեզն ու բարին կրնայ բաժակին հետ մոլեգնութիւն ըմպել եւ թիկնաթոռէն երթալ ի կախաղան : Իսկ զաւակներն գինեմոլներու . ո՛հ , խեղճ ու անմեղ արարածներ որ կը քաւեն իւրեանց հօր յանցանքն՝ ժառանգելով նորա Ֆիզիքական ու բարոյական հաշմութիւնքն ու ախտերն . այդպիսեաց զաւակունք տկար են մարմնով եւ ջղային հիւանդութեանց տրամադիր , իսկ մտապէս կը կրեն հօր ընդարմայեալ եւ ապշած ուղեղին տպաւորութիւնն . . . : Գինեմոլութիւնն ու-

րեմն մի զբօսանք չէ . նա ոչ թէ կը կազմէ եւ կը վերաշինէ զմեզ՝ ներդաշնակութիւն դնելով մեր կարողութեանց գործունէութեան մէջ, այլ կ'ապականէ եւ կ'աւերէ զմեզ նիւթապէս եւ բարոյապէս :

Դ

Ծնելն մի այլ հանգիստն ու զբօսն է մեր , մեր , աւանդ , ոչ թէ միայն հասուն մարդոց ու երիտասարդաց , ոչ թէ միայն յաճախ անպէխ սպտանեաց խկ , այլ եւ տիկնանց եւ օրիորդաց : Յաւալի ճշմարտութիւն , բազումք մեր տիկիներէն եւ օրիորդներէն կը ծխեն , կ'ընեն այն ինչ որ կրթեալ ազգաց գէթ իգական սեռին մէջ անհամեստից բաժինն է . իւրեանց փափուկ կրծերն չեն դժգմիր այն հեղձուցիչ ծուխէն եւ գէթ չեն խնայեր իւրեանց դէմքն այն դեղնութենէն զոր ծխախտտի ծուխն կը տարածէ զրեթէ ամէն ծխողներու երեսի վերայ : Ոգին գրգռիչ է , ծխախտտն թմբեցուցիչ . միոյն մէջ մի գրգռումն կը խնդրեմք՝ թէ եւ կեղծ եւ

վաղանցիկ , զի այդ կարճատեւ գրգռման գրեթէ իսկոյն կը յաջորդէ ջղաց տկարութիւն ու լքումն , միւսոյն մէջ , որպէս ասիոնինն ու հաշիշին մէջ Ասիոյ ժողովուրդք , թմբութիւն ու անուրջ կը խնդրեմք . եւ կը ներմուծեմք ի մեզ այդ թոյնն , այո՛ , զի ծխախտտն մի թոյն է : Մանաւանդ ծխամոլներ չպակսին առ մեզ . ուր որ կազմուած կը տեսնեմք մի ակումբ , ահա ծխախտտի մուկը կը պատէ զայն իբրեւ մի ամպ եւ կը կազմէ մի մղձկուտ՝ զարշահոտ եւ ապառուղջ մթնոլորտ . եւ այնչափ է մեր մոլութիւնն զի կը ծխեմք նաեւ ուր ամէն երկրի մէջ պատշաճութիւն կ'արդելու ծխել , թատեր՝ նուագահանդիսից՝ լսարանաց մէջ . այնքան վարժուեր եմք այդ թոյնին եւ այնքան բնական կ'երեւի մեզ ծխելն . չծխողն մի երեւոյթ է հազուադէպ եւ զարմանաց արժանի : Բայց գիտութեան փորձերն կը հաստատեն թէ «մտաց յատակութիւնն կը բթի , բերանացի եւ գիմային բացատրութեան կարողութիւնք կ'եղծանին , յիշողութիւնն կը փնասի , եւ , ծայրայեղ պարագայից մէջ , ամբողջովին կը կորսուի . շունչն կ'ապականի , բերունն ներքին մաշկն կը փնասի եւ կարէ յա-

ուջ գալ մի ծանր խաղաւարտ, սեռային կարողութիւնն կը թմրի եւ, եթէ մարտողութեան խողովակէն ստամոքսին մէջ անցնի այս խոտ, իսկոյն կը թունաւորէ: » (*)

Այս վնասներն չեմք զգար զի տակաւ կ'ազդէ թոյնն, բայց վնասն քանի կ'երթայ՝ կ'աճէ. թոյնն կը դիզուի, եւ ահա մի օր այլ եւս չափազանց ուշ է ազատելոյ համար նորա ազդեցութենէն: Այս խոտին ուղեղին վերայ, մանաւանդ ծխամուկներու, ըրած աղիտաբեր ազդեցութիւնն ցոյց տալոյ համար բաւ կը համարիմ յառաջ բերել աստ Օկիւսդ Լիւչի հետեւեալ հատուածն.

« Աքսորանաց մէջ, կ'ըսէ նա, (զի Լիւչի ժէրսէյ ապաստանած էր փախչելով մի անիրաւ գատապարտութենէ), տեսայ իմ երկրէս մի տղայ որ հանճարամիտ քերթող էր, կրակոտ, անհանգիստ, անդադար դողդոջուն ու բոցացայտ աւիւնով եւ սիրով մին այն մատղաշ, դալար, անհանդարտ ու բարի էակներէն որք ամենուրեք կը մոռցնեն քեզ նժդեհութիւնդ եւ զորս իսկոյն եղբայր կամ որդի կ'ընես քեզ, որ հէք ողբազին աքսորա-

կան մ'ես: Նա յայնժամ կը խոստանայր, երբ ժամն հասնէր, մի ոյժ եւ մի լոյս լինել իւր սերնդեան համար. Գաղիա դարձաւ, եւ չգիտեմ ինչ նրատճառաւ՝ սկսաւ մոլեգինս ծխել: Այդ օրինակ բնութիւնք ոչ բարիքն եւ ոչ չարիքն կարեն անկատար՝ կիսով իմն ընել: Իւր ունեցած բոլոր կիրքն ու կորովն ցնդեցաւ գնաց. հայրենիք, ընտանիք, սէր, բարեկամութիւն, շահ, արժանապատուութիւն, առողջութիւն, ծխափայտն ամէն բան կ'ընեց: Երբեմն կուգայր զիս տեսնել, յիշատակաւ, ինքզինք այնքան մարած չկարծեւոյժ. կը նստէր իմ դիմաց, աւուանց բառ մի արտասանելոյ, կիսով վերցընելով իւր շուրջն մի անորոշ հայեցուած, երբեմն երկինքն այնքան փայլատափանց: Եթէ առանձին լինէինք, իւր գրպանէն կը հանէր զգուշութեամբ ամէն ձախորդ շփումէ պահպանուած ու զգեցուած ծխափող մի, եւ զայն կը մերկացնէր ինչպէս մի մայր պիտի ընէր իւր որդին, կը ցուցնէր ինձ նորա սեաւ ձանձախարիթն ցուրտ ու հիւանդագին հպարտութեամբն այն քիմիագէտին զոր մաշեցուցած է աշխատութիւնն: Ես չգարմանայի, կը զայրանայի: Յետոյ յամբարար

(*) Պոյեէ, Գիսական բառարան. Մխախոս:

վերստին պահարանին մէջ կը դնէր այս ամենասիրելի ծխափողն, կը լեցնէր զայն կրօնական երկիւզածութեամբ, յարգանք կը վառէր, եւ, անտես առնուած բարեկամի մի ախուր ժպտովն ժպտելով, լռիկ կ'ենէր կ'երթայր որպէս եկած էր:» Տխուր պատկեր ծխախոտոյ գործած բարոյական աւերին: Այս աւերն, առանց թերեւս մեր նշմարելոյն, քանի քանի երիտասարդ անձերու վերայ կը գործուի մեր մէջ. եւ մեք, անդէտ, «խեղճն, երբեմն սրջափ սղխոյժ, հանձարեղ ու գործօն էր, ինչ եղաւ իրեն» կ'ըսեմք ու կ'անցնիմք. եւ քանինէր կը տկարանան յետոյ խնացականութեամբ՝ որք այնքան վառվառն եւ ուշիմ էին դպրոցական կեանքի մէջ: Այսպիսի անկումներու եւ խաւարումներու մէջ, եթէ քննուի, քանի մեծ դեր ունի արդեօք ծխելոյ մոլութիւնն: Եւ չհասկանամ թէ ինչ կայ հաճոյք այդ ծուխի մէջ զոր այնպէս անյազարար կը ծծեմք. — հաճոյ է, կ'ըսեն, թողուլ միտքն թափառիլ մի հեշտալից տարտամութեան մէջ այդ ծխոյ ամպերուն հետ, եւ թէ խոհանօք ու անուրջներով բեղմնաւոր է այդ միդամած հորիզոնն որ կը կազմուի մտքին բոլորտիքն. —

էհ, հաճոյքն է սա ծուխին. ընդարմացեալ ուղեղին թուլութիւնն իբրեւ բարիք ընդունիլ. եւ եթէ երազ կ'ուզեմք, ո՞վ կ'արգելու զմեզ քնանալէ: Մ'հ, կարծես, մարդկային էակին համար միտքն մի անտանելի բեռն է, զի ամէն միջոցով կ'ուզէ զերծանիլ անտի...:

Ե

ԽԱՂ, ահա մի այլ զբօսանք: Ճարտրակի, նարտի, թղթի խաղք ի վաղ ժամանակաց հնարուած են եւ կերպիւ իւրիք մտային մարզանք են. կ'ընդունին: Ճարտրակի ծնունդն կը հանեն մինչ ի Տրովական պատերազմն զիւրելոյ համար Աքայեցւոց տաղտուկն Տրովադայ պարսպաց տակ, կամ մանաւանդ նորա ծնունդն պէտք է փնտռել Հնդկաստանի մէջ, մեր թուականին Զ. դարուն մէջ. նարտն ծանօթ էր շատ հին ժամանակներէ եւ Յոյնք ու Հռովմայեցիք կ'զբօսնուին այնու, եւ թուղթերն հնարուած կը համարուին ժ. Դ. դարու մէջ ի զբօսուցանել զյիմարութիւն կարողս Զ. Ի՝

Թագաւորին Գաղտոյ : Կ'ընդունիմ որ , ձմե-
րային գիշերներու մէջ , երբ ընտանիքն թըղ-
թախաղի սեղանին շուրջն բոլորած՝ իւրա-
քանչիւր ոք զուարթ կը նետէ իւր թուղթն
եւ ի մէն մի պատրանք կամ ի մէն մի յաղ-
թութիւն քրքիջներ կը բարձրանան մեծա-
ձայն , թուղթն մի անմեղ զուարճութիւն ու
աշխոյժ կը բերէ ընկերութեան մէջ , կը
նպաստէ մտաց գործունէութեան եւ կը ծա-
ուայէ մեղմացներոյ դանդաղ ժամերու տաղ-
տուկն : Այո՛ , բայց ինչ որ չեմ ընդունիր՝
զեղծումն ու չափազանցութիւնն է , ինչ որ
կը մերժեմ նողկանօք՝ շահագէտ խաղամո-
լութիւնն է : Երբ խաղն մի կիրք , մի անյադ
աենչ կը դառնայ եւ կ'ընեմք զայն գործի
շահադիտութեան , այլ եւս կը դադրի գրօ-
սանք լինելէ : Եւ այս հազուագիւտ մոլու-
թիւններէն չէ մեր մէջ : Մեր ժողովրդային
սանդղին ամէն աստիճանաց մէջ կայ այն ,
եւ որչափ վերն ելնեմք՝ թերեւս այնքան
աւելի ընդհանուր : Տե՛ս սօքա որ նստել են
խաղու սեղանին շուրջն . լուս ու մունջ են .
խոժու են իւրեանց դէմքերն , եւ վայրան-
կեալ յօնից տակէն իւրեանց աչքն կատաղի
հայեցուածներ կ'արձակէ . կատաղի ու վայ-

րենական է շահողին ուրախութիւնն , կա-
տաղի ու վայրենական է կորուսնողին վայ-
րոյթն . բայց խաղու աստուածոյն շնորհներն
անհաստատ են ու դիւրափոփոխ . ահա ընդ-
հուլ դերերն կը փոխուին . իւրեանց բոլոր
մտաւոր կարողութիւնք գրաւուած են այդ
խաղու մէջ . այդ թղթերն երբեմն հրէշներ
կը թուին որ դիւային ժպտով մի կը խնդան
ու կը ծաղրեն կորուսնողն , հէք կալանաւոր
անշունչ քարտէսներու . յանկարծ մի հայ-
հոյութիւն կը պայթի դժոխալուր , եւ յա-
ճախ կանգ , կռիւ , ծեծ , եւ արիւն խսկ եր-
բեմն : Բռնաւոր կիրք . որչափ դժուար է
զերծանիլ իւր ճանկերէն՝ անգամ մի որ
մարդ նորա երկաթի բազկաց մէջ ինկած է ,
կորուսնողն կը դառնայ յայն դարմանելոյ
համար իւր կորուստն , եւ մի վտանգաւոր
հրապոյր ունի շահէլն . Սատանին փորձու-
թիւնն է այն . մեզրն է որ կ'օժէ մի բաժա-
կի եզրն որ թոյն ունի իւր յատակն : Երկո-
քին եւս կը դառնան անդր՝ մարդ հետզհետէ
կը չաղապատի այդ ցանցին մէջ որ տակաւ
անելանելի կը դառնայ : Հարստութիւնք
կ'իյնան այդ անդունդի մէջ որ պտոյտ կու-
տայ դլխոյ , եւ քանիներ կ'սպառեն անդ

օրապահիկն իւրեանց ընտանեաց . խնայողութեամբ յաւելեալ գումարին ետեւէն կ'երթան կնոջ զարդերն , ապա հագուստք՝ կարասիք , ապա գողօնք , ապա ամէն ինչ , եւ անօրինակ չէ յուսահատ անձնասպանութիւնն : Խաղամոլութիւն , ի բաց այդ հրէշէն , որ կեանքն մի գերութիւն կը դարձնէ , մարդոյն օրերն կը դառնացնէ եւ քունն իսկ կը խլէ աչերէ , որ ընտանիքներ կը փլէ եւ երջանկութիւններ կը կործանէ , որ զմարդ կը նուաստացնէ , — զի ճակտի քրտանց շահն է միայն սրբազան շահն — , կը յիմարէ , կ'անբանացնէ , կ'ապականէ :

2

Չուզեմ յանուանէ նկարագրել այն անխոստովանելի ընկերութիւններ ուր հաճոյք ու զուարճութիւն կը խնդրեն բազումք մեր երիտասարդներէն : Սուրբ Սէր՛ն կ'ազնուացնէ եւ կը սրբագործէ կեանքն . առաքինութեան հզօրագոյն յորդորն է , եւ խրախոյս՝ կատարելութեան : Որ ոք կը սիրէ մի պարկեշտ տարփանօք՝ յարգանօք կը համակի իւր սիրոյ առարկային նկատմամբ որ նուիրական է նորա համար . ի նմա կը տեսնէ ամէն կատարելութիւն . նիւթն չէ որ կը յանկուցանէ զինքն , այլ հոգին , եւ հոգեկան ճրից սիրահարիլ՝ պաշտել է հանճարն , անմեղութիւնն , շնորհն , գորովն , բարութիւնն : Ճշմարիտ սիրոյ հրոյն մէջ՝ իբր ի բովու՝ կը գտի կ'ազնուանայ հոգին , կը մեծնայ մարդ ուզելով ամէն օր աւելի արժանի լինել իւր պաշտած հոգւոյն սիրոյն՝ համարման , եւ այս փափաքին մէջ քաղած են մեծագոյն ոգիք իւրեանց ոյժն , եւ այս է գաղտնիքն շատ մի

հրաշակերտից ու սքանչելեաց ծննդեան : Պէտք է որ երիտասարդութիւնն , իբր իդէ-
ալ իւր կեանքին , իւր աչքին առջեւ , բարձրն ,
ունենայ մի անբիծ պատկեր անմեղութեան՝
գեղոյ եւ շնորհաց , որ քաջալերէ զինքն իւր
յառաջացման ու կատարելագործութեան
ճգանց մէջ , պահպանէ զազիր հաճոյքներէ ,
գեղեցկին ու ազնուին ճաշակն վառ ու
անվթար պահէ նորա սրտին մէջ եւ քաղցր
ու բանաստեղծական յուսովն մի երջանկա-
ւէտ ապագայի մեղմէ դժուարութիւնքն ու
մրցմունք այն տարիներուն յորա մարդ կը
պատրաստուի կենաց : Ճշմարիտ սէրն կենաց
առաւօտուն խունկն է ծաղկարոյր . պահա-
պան զուարթունն է երիտասարդ տիոց :
Բայց զիւրին եւ արծաթագին սէրն , որ
գունդագունդ առ ինքն կը ձգէ մեր երի-
տասարդութիւնն , մի ազրիւր է ապակա-
նութեան , անասնացման , թշուառութեան ,
մահուան : Նա մի հրեշտակ է , սա մի դեւ .
նա մի աստուածուհի , սա մի Մեղերա , ի-
ժահեր , ջահ ի միում ձեռին եւ ի միւսում
զաչոյն : Միոյն եւ միւսոյն մէջ միայն անունն
կայ հասարակաց , զոր պղծած են , ինչպէս
չատ սրբազան իրաց անունն : Ո՞րք են այն

զուարճութիւնք որ իրենցմէ յետոյ աւելի
զիդջ , ամծթ եւ , յաճախ , երկարատեւ ու
դժոխսումբեր ցաւեր թողուն քան այս տոհիւք :
Այդ սիրոյ մարմարեայ ու մահաբոյր գրկաց
մէջ կը չորնայ վաղաթառամ երիտասարդու-
թեան ծաղիկն . այդ ապականեալ շրթանց
վերայ զմահ կը համբուրէ շատ անգամ պա-
տանին . հոգւոյ բոյրն կը ցնդի , դեռ ոչ ե-
րիտասարդ՝ կը ծերանայ ոք , եւ յաճախ մի
վայրկենական հաճոյք կը քաւէ տարիներու
տանջանօք , անբոյժ տկարութեամբ , եթէ
ոչ վաղահաս մահուամբ . թո՛ղ որ մինչ մեք
միայն զգայական հաճոյք կը խնդրեմք ի
նմանէ , նա՛ այդ անախրտ էակ՝ աչքն ի մեր
քսակ ունի յառած զոր կը պարպէ անագո-
րոյն՝ զրուելով այսպէս բաժինն քրոջ եւ ,
կ'ամաչեմ ասել , կնոջ եւ ամենէն անհրա-
ժեշտ պէտքերու : Թո՛ղ այսուհետեւ ամուս-
նանայ այդ երիտասարդ . ի՞նչ ունի ընծայել
իւր մատաղ ու անբիծ ամուսնոյն . — մի
մարմին մաշած ու տկար , մի սիրտ մարած
ու յափրացեալ եւ ֆիզիքական ու բարոյա-
կան հաչմութիւն ածանցելոյ իւր զաւակաց :

Է

Ահաւասիկ գլխաւոր գրօսանք եւ զուար-
 ճութիւնք մեր Պօլսոյ ժողովրդեան եւ երկ-
 տասարդութեան. — կը պատասխանեն սո-
 քա գրօսանաց նպատակին. — եւ ո՛չ իւրք.
 գրօսանքներն պարտին կազդուրել, վերա-
 շինել. սոքա կը ջլատին, կ'աւերեն, կը մա-
 հացնեն. նոքա պարտեն ներդաշնակութիւն
 դնել մեր կարողութեանց մէջ, սոքա խան-
 գարում եւ եղծում կը բերեն. մարմնոյ եւ
 հոգւոյ քայքայման միջոցներ են, կ'սպաննեն
 անհատն, եւ ազգերն անբարոյականութեան՝
 ստրկութեան ու թշուառութեան կը մատնեն :
 Չարայուչն Նարոլէոն Գ. զԳաղիա անարգու-
 թեան մէջ պահելոյ եւ գայն իւր բռնական
 գաւազանին հըւ գործելոյ համար, իբր ազդո-
 ղագոյն միջոց ընտրած էր բազմապատկել՝ որ-
 չափ հնար էր՝ այն կեղրոններն ուր մարդ իւր
 ստակով կը գնէ այն ապառողջ ու ապակա-
 նարար գրօսանքներն զորս նկարագրեցի եւ
 զոյգ ընդ նոսին ապշութիւն՝ անզգայութիւն՝

անասնութիւն. եւ այս հնարքով յաջողեցաւ
 Գաղիոյ ազնուական ազգին վերայ բռնաւո-
 րութեանց ամենէն եղեւնալին ու անարգն
 ծանրացնել մի աւազակ, որպէս կը կոչէ զնա
 Պասուխասից եւ Ահաւոր Տարոյ Հեղինակն :

Տեսնենք արդ թէ՛ որք են այն գրօսանք
 զոր ընտրել պարտի մանաւանդ մի ժողո-
 վուրդ որ կ'ուզէ մեծնալ, որ լաւ կը հաս-
 կանայ թէ՛ ինչ են գրօսանք եւ նոցա մէջ հա-
 ճոյից հետ նոր նիւթեր կը խնդրէ մարմնոյ
 եւ հոգւոյ շինման : Այս կարգի գրօսանաց
 մէջ կան այնպիսիներ որք մուտ գտած են
 առ մեզ՝ բայց յոռի կամ սնկատար կերպով,
 եւ կան այլք որք անծանօթ են մեր ժողո-
 վրդեան :

Ը

Երբ գեղեցիկ եղանակն է, երկինք պայծառ, օդ՝ ջինջ եւ ջեր, ծառերն պճնուած են տերեւազարդ, մի կանաչ խոտ կը ծածկէ բլուրն եւ մարգագետինն գոյնզգոյն ծաղկունք կը կկեն, սաղարթուց մէջէն անոյշ կը շնչէ հովիկն, եւ խոտոց տակէն մրմնջածայն կը սողոսկի վտակն արծաթի, քանի քաղցր է ՊՏՈՅՏՆ հովտին մէջ, բլրոյն կուշան կամ ծովուն եզրն: Անարատ հեշտութեամբ լի եւ օգտաւէտ է միանգամայն այս գրօս. մաքուր օդն կը մաքրէ թոքերն եւ կը զիւրէ շնչառութիւնն՝ մանաւանդ երբ մարդ զուրս կ'եղնէ մի սենեկէ կամ գործարանէ ուր ժամերով փակուած է մնացեւկանաչութիւնն կը պարարէ աչերն, ծաղկանց բոյրն կը գգուէ ունզն, մինչ հովին ու աւեակին մրմունջն կը զիւթէ ականջներն. ամէն զգայարանքներէ ներս կը թափանցէ մի սուրբ ու առողջ հեշտութիւն որով կը համակի մարդ, մարմին եւ հոգի միանդա-

մայն կ'ընդլայնին՝ կը շնչեն մեծ ու ազատ, հոգք կը փարատին կնճռեալ ճակատէն որ կը պարզի, եւ հաճոյական պատկերներ կը գրաւեն միտքն: Ո՛վ սրբազան հաճոյք բնութեան, ո՛վ հեշտալից ստուերք խորհրդաւոր անտառաց, ձեր ծոցոյն մէջ սրչափ անդգալի կը սահին ժամերն, եւ մարդ այդ ծաղկազարդ զառիվայրից վերայ քանի աշխուժիւ կը վազէ կ'ոստոստէ. ծերն կը կարծէ վերստացած լինել իւր պատանեկան օրերուն աշխոյժն ու կայտիւն: Պարզել մի գեղջկական սեղան կակուղ խոտոյն վերայ եւ սաղարթեայ հովանւոյն տակ, նստիլ մամուաչէն բազմոցներու վերայ, դնել միրգն տերեւէ պնակներու մէջ, առնուլ պարզ ճաշն որոյ չափ երբէք քաղցրահամ չեն թուած համադամք, լսելով՝ իւր շուրջն՝ մանուկներու զուարթ շաղկապին որ կը խառնուի տերեւոց մէջ պահուտող թուշկին խաղերուն կամ ծովեզեր ալեաց կարկաջին հետ. ետ դառնալ երեկոյին, երբ տակաւ հորիզոնին վերայ կը սրբուին վերջապուտոյ յետին նշոյլք, դալարեօք կամարազարդ ծառուղիէ մի կամ մի մակուկի մէջ խաղաղաջուր ծովուն վերայէն հանգարտընթաց, ինչ գուարձութիւն, եւ ինչ

օր. այդ աւուր կենսաւէտ բոյրն կը տեւէ բոլոր շաբաթն եւ կը խնկէ ու կը քաղցրացնէ շաբաթական վաստակն: Բնութեան այս հաճոյքն վայելողք բազումք են առ մեզ. ամառնային եղանակի մէջ երկսեռ բազմութեամբ կը լնուն զբօսավայրք ընդ երկնաւ եւ ձեմելիք. սակայն, յաճախ գինեմոլութիւնն կու գայ պղծել այս սուրբ հաճոյք. շատեր մեր իգական սեռէն կը փակուին կը մնան իւրեանց չորս պատերուն մէջ՝ երբ երկնից մէջ այնքան զուարթ կը փայլի արեգակն, զի բաւական հագուստ չունին մրցելոյ համար չքեղահանդերձ տիկնանց եւ օրիորդաց հետ, կարծելով թէ պարզ ու վայելուչ հանդերձ մի բաւական չէ զարդարելոյ համեստութիւնն ու փայլեցնելոյ բնական շնորհներն. եւ դարձեալ մեր նեղ ու աղտոտ փողոցաց գինետուններն եւ սրճարաններն բոլորովին չեն թափուր իւրեանց սովորական հիւրերէն որք կը խմեն եւ կը խաղան: Բնութեան բանաստեղծութիւնն պէտք է սիրել. նա ամենուս կը խօսի, համեստ գործաւորին որպէս իմաստասիրին եւ բանաստեղծին. բայց ամէնէն խոնարհ գլխոյն մէջ իմաստասիրութիւն եւ բանաստեղծութիւն կայ եւ

կրնայ կարգաւ բնութեան իմաստներն: Եւ յետոյ, բնութեան ծոցոյն մէջ այդ ձեմոց եւ պտոյտներու ազդեցութիւնն մարմնոյն վերայ քանի՛ առողջարար է. մանաւանդ երբ չարեմք միշտ բազմութեամբ երթալ խոնուել միւսնոյն տեղոյ մէջ. միայն ուր որ մի սրբճարան կանդնուած է՝ հոն միայն չէ բնութիւնն զեղեցիկ. ամենուրեք սփռած է նա իւր գեղեցկութիւնքն. լերինք եւ բլուրք ինչ հովիտներ ունին, ինչ հովանաւոր ծործորներ, անտառք ինչ խորհրդաւոր ու զով ստուերներ. պէտք է թափառիլ, դեգերիլ, վազել, արշաւանք ընել՝ յառաջընթաց արձակելով մանուկներն որ ի մէն մի քայլ ետ սլիտի դառնան առ մեզ մի ծաղիկ բերելով զոր քաղել են զմայլմամբ կամ մի թիթեան շղարջաթեւ որ իւրեանց մատիկներուն մէջ կ'օգորի կամ ցուցնելով մի թռչնիկ որ կ'օրօրի մի ոստոյ ծայրն. եւ նոր ու ակործաղիր վայրերն՝ զոր պիտի գտնեմք՝ պիտի հաճոյք առթեն մեզ այնպէս որպէս թէ մէն մի Գոլոպոսներ լինէինք:

Թ

Թէ բնութիւն միշտ մեր մօտ չէ, մանաւանդ մեծ քաղաքի մէջ, թէ ձմեռն կը թողուն զմեզ դալարիք եւ ծաղիկք, կարելի է մեզ բնութեան մի մանրանկարն յօրինել առ մեզ՝ մեր տանց մէջ՝ ՊԱՐՏԷՉներով:

Աւաղ որ, թէ եւ տակաւին այս տեսակ թագերու համար չէ, բայց Բերայի վերայ խօսելով, պարտէզք հեռոցհեռէ կը սրկսին, եւ այս ոչ միայն ընտանեկան յարկերու բանաստեղծութիւնն ու հրապոյրն կը նուազեցնէ, այլեւ կը փնասէ օդոյն առողջութեան. ամէն տուն պէտք է որ ունենայ իւր ետին կամ առջեւն իւր պարտէզն՝ իւր բնութեան պատան. ապականարար մահաբոյր է մարդոց շունչն, պէտք է որ բնութեան սուրբ շունչն միջամտէ եւ բնակութիւնք մարդոց անջըրպետեալ լինին բնութենէ, բոյսին կեանքն խառնի կենդանեաց կեանքին հետ: Անպար-

տէզ տուներու մէջ այլ այս պակասութիւնն կարելի է դարմանել ծաղիկներ մշակելով թաղարներու մէջ արեգակնակներու վերայ, պատուհանաց առջեւ, եւ՝ ձմեռն՝ սենեակներու մէջ, երբ կը պակասին ճոխին ջերմոցներն: Ծաղիկներու մշակութիւնն մի քաղցր ու փափուկ զբօսանք է. յասմիկն, մանիշակն, կակաչն, շեփորուկն, անթառամն, մելտակն, շահպրակն, հարսնամատնն, վարդն, գամելլիան եւն, զոդցես, քնքոյչէակներ են որ երկրի վերայ կը պատկերեն շնորհ, անմեղքութիւն, ազնուութիւն եւ փափկութիւն. ինձ այնպէս կը թուի թէ նոցա հետ ընտանութիւնն ոչ միայն մի ազնիւ զբօս կ'առթէ մեզ՝ այլեւ մեր զգացմանց վերայ մի բարեբար եւ ազնուարար տպաւորութիւն կ'ընէ ինչպէս տեւիլն ամենայնի որ գեղեցիկ՝ մատաղ եւ անմեղուկ է: Թէ շատ մի մտեկան վայելից տենչին տեղ բռնէր պարտիզի բուսոց եւ ծաղկանց սէրն, մարդիկ պիտի կրնային իւրեանց ընտանեկան յարկաց տակ անցնել հեշտիւ եւ օգտիւ ժամեր որոց ձանձրոյթն պիտի չարչարէր զիրենք կամ զորս պիտի փութային խեղզել ազտոտ զուարճութիւններու խոհերանաց մէջ, եւ կը հաւատամ

թէ մեր, այր թէ կին, բարուց վերայ պիտի ազգէր նախատաւոր կերպիւ : Ծաղիկն պիտի զբօսցնէր, զուարթացնէր, յախշտակէր, սփռփէր, կրթէր . . . :

Ժ

Մեր երիտասարդք կ'երգեն : Լուտեր կ'ըսէ . « Երգելն ամէն արուեստից ամենէն աւուողն է եւ մարդանաց լաւագոյնն : Բնաւ հազորդակցութիւն չունի աշխարհի իրաց եւ հակառակութեան խնդիրներու հետ : Երգող մարդոյն ոգին չկարէ թաղծաղին լինել, եւ հոգք չառնուն կանգ իւր բնակարանի վերայ : » Երգելն, այո՛, զուարճութեանց ամենէն սրբագոյնն է . երկրային թիւերն ամենէն անհրաժեշտ փրկաւէտ զբօսանքներէն մին : Թողլով կրծոց ընդլայնման ու զօրացման մասին իւր աւուղջարանական օգուտն, բարոյական օգտակարութիւնն յոյժ մեծ է : Լուտեր լաւ զգացած էր զայս, ինքն որ կը վերաբերի ամենէն աւելի երաժշտական զգացում ունեցող ազգին, — Գերմանացւոյ :

Ոգիքն զարթուցանող, մտաց աշխոյժ տուող, զգացումներն վառող բորբոքող, վիշտն օրօրող ու ամբողջ, վհատութիւնն սփռող, հոգին ընդլայնող, գձուճ զգացումներն հաւածող, սրտերու մէջ հաւատ եւ յոյս սփռող, զմարդ աստուածային գործող երկնային արուեստն է այս : Եւ մարդիկ չկարեն անցնիլ ի նմանէ . պէտք է որ երգեն, երգեն՝ երբ ուրախ են, երգեն՝ երբ կը սգան, երգեն՝ երբ կ'աշխատին, երգեն՝ երբ կը զբօսնուն : Ուստի կ'երգեմք եւ մեք : Սակայն դժբախտաբար մեր սիրած երաժշտութիւն մի շատ յետադէմ երաժշտութիւն է . արեւելեան մենակերպ ու մեղի երաժշտութիւնն է որ կ'ողբայ յաճախ մեր շրթանց վերայ եւ կը հնչէ մեր տանց մէջ . եւրոպական գրեթէ անծանօթ է մեզ, այսինքն կատարելագործեալ եւ ազնուագոյն երաժշտութիւնն : Հետեւապէս այս քաղաքակրթիչ արուեստին կենսաւէտ ազդեցութիւններէն դեռ զուրկ եմք . արեւելեանն թերեւս կ'զբօսցնէ ըզմեզ, բայց կը մեղիէ՛ կը թուլացնէ՛ կը քնացնէ՛ դանդաղահոս վտակի մի մենակերպ կարկաջին նման, եւ իւր մենակերպութեան ու նահապետական աղքատութեան մէջ մեր հո-

զւոյն հետ խօսելոյ շատ բան չունի. միշտ միեւնոյն նուազկոտ խաղերն են. ո՛հ, արդէն կարի իսկ թմրեալ եմք. մեզ պէտք եղած երաժշտութիւնն այն է որ ջիղ ունի, ստք կը հանէ ջղերն, ցունց կուտայ մեր զգայութեան թեւերուն, խորհուրդ եւ զգացում կը ներշնչէ մեզ, բացատրութիւն ունի. մեզ կըլիւքի, Պախի, Մոցարդի, Պէթոֆէնի, Վէպէրի, Շօբէնի, Ռոսսինիի, Տօնիժէդգիի, Կունօյի, Օպերի երաժշտութիւնն է հարկաւոր. պէտք է որ գայ ազնուացնել մեր գրօսանքներն, սրբագործել մեր ընտանեկան յարկերն, կանգնել մեր բարոյակաճութիւնն: Այո՛, կանգնել մեր բարոյակաճութիւնն. զի երաժշտութիւն կը սլահզպանէ մտլութենէ: Գերմանացի մայրեր կան, կը վիպյէ Քամիլ Սէլտըն որ «Երաժշտութիւն ի Գերմանիա» անուն մի գիրք գրած է, որք Համալսարանական դասուց հետեւելոյ համար հայրենական գիւղէն կամ քաղաքէն մեկնող իւրեանց զաւկէն բաժնուելոյ վայրկենին՝ մեզմիկ Պախի մի օրարիօն, մի քանի յիւր ի (երգոց) տետրեր կը սպրդեցնեն այն նոր Կտակարանին քով որով կը գինեն գնա: Գիտեն զայս Գերմանիոյ մէջ. ուստի եւ երա-

ժշտութիւնն անդ մինչեւ իսկ ընտանեկան դաստիարակութեան մի անբաժին տարրն կը կազմէ. առաջին բառերուն հետ առաջին նօթերն կ'ուսնի մանուկն. դաշնակն տան մի անհրաժեշտ կահն է. իշխանն իւր քանդակագործ գեղեցկակերտ դաշնամուրն ունի եւ շինականն եւս իւր պարզ ու անզարդ դաշնակն. բայց «թերեւս օրուան մի եւ նոյն ժամուն», կը գրէ Սէլտըն, միոյն ինչպէս միւսոյն վերայ «մի եւ նոյն ակնակոյն հնչեց»: Սովորական բան է ի Գերմանիա ընտանեկան ակումբներու մէջ յանկարծ յանպատրաստից մի գոնսեր կազմել: Մենտելսոն կը պատմէ թէ հրաւիրուած լինելով մի տուն ուր Ծննդեան նախատօնն կը ցնծային, կ'առաջարկուի իւրեան մի եզանակ յարմարել մի ոտանաւորի զոր իւրեան նուիրել էին. կը հաճի Մենտելսոն, աիկնայք՝ օրիորդք իսկոյն կը փութան մին թուղթ միւսն մատիտ բերել, երգահանն անդէն ի գլուխ կը հանէ իւր գործն, եւ ահա պարն կը կազմուի եւ հիանալի կատարելութեամբ իսկոյն կը լուծեն ու կ'երգեն նորահիւս նուազն: Մեր ընտանիքներն դեռ շատ հեռի են երաժշտական այս աստիճան մշակութեան հասնելէ,

բայց պէտք է որ ընեմք ամէն ինչ որ կարելի է այս գեղարուեստին մշակման եւ տարածման համար: Վարժարանաց մէջ հարկ է ստիպիչ ընել երաժշտութեան ուսումնի, եւ զգուշանալ զայն իբրեւ մի զարդ նկատելէ. հոգւոյ կրթութեան, մարդկային բարոյական դաստիարակութեան անհրաժարելի լրացուցիչն է. եւ յետոյ, չափահասք պարտին երաժշտական ընկերութիւններ կազմել, որ պէս կան լուսաւորեալ ազգերու մէջ, եւ որպէս մայրաքաղաքիս մէջ աստի 4-5 տարի յառաջ կազմած էր Անգղիական գաղթականութիւնն, — British Choral Union: Այս խմբերգական ընկերութիւնք ազգային երիտասարդութեան համար նոր ու վսեմ գրասանքներ պիտի հայթայթեն. մեծ ողիներու ներշնչութիւնք պիտի թափանցեն մեր ընտանեկան ակումբներու մէջ եւ իւրեանց բարերար ներգործութիւնն ազգեցնեն՝ ջնջելով աւերիչ ազդեցութիւնն վատթար զուարճութեանց եւ մեղկ ու մոլի ներգործութիւնն թրքական երգոց: Երաժշտական տաղանդներ կարեն ծլիլ ու զարգանալ, մի ազգային երաժշտութիւն ծնունդ առնուլ, եւ միտքն ինչ վեհ խորհուրդներ, սիրտն ինչ

արիւթիւններ, հոգին ինչ յանդգնութիւններ կարէ քաղել ճայներու այն զիւթական աշխարհէն յոր հայ հանճարներ թոցնեն մեր ոգիքն հայկական նուազներու թեւոց վերայ . . . :

ՓԱ.

ԹԱՏՐՈՆՆ մի զբոսանաց եւ հրահանգման վայր է միանգամայն, ասել է մի օգտաւէտ զբոսանաց. թատրոնն կը կրթէ զբոսուցանելով եթէ, սակայն, փոյթ տարուի որ խաղք բարոյալից լինին, եւ ոչ թէ զազիր մոլութեանց տեսիլն պարզեն անպատկառ: Դարերէ հետէ թատրն կրթած է զժողովուրդս, մերթ ողբերգութեան մէջ ներկայացնելով մեծ թշուառութեանց տեսիլն, մերթ կատակերգութեան մէջ մարդկային բարուց յոռի ու պակասաւոր կողմերն մատնելով ամէնուն ծաղուն ու ծիծաղին, եւ տրամայի մէջ աւելի ճշդիւ պատկերելով ընկերութիւնն իւր ուրախութիւններովն ու վշտերով, իւր առաքինութեամբքն ու մո-

լուծեամբք, իւր վսեմ ու ծիծաղելի հան-
դամանօք, իւր մրցումներովն ու յաջողու-
թեամբք կամ անկուսներով, միտալն իւր
երկու կողմերով: Պատմական խաղերու մէջ
անցեալն կը վերակենդանանայ, առաքինիք
եւ մոլիք դուրս կ'ելնեն իւրեանց շիրիմներէն
գալ կրկնել մեր առջեւ՝ մի մոգական տե-
սարանի վերայ՝ իւրեանց կռիւն, իւրեանց
կեանքն, արգաւանդ դասերով. եւ երբեմն,
մանաւանդ ինքնաստեղծ խաղուց մէջ, իտէ-
ական տիպարներ ազնուական ոգւոց կ'զմայ-
լեն զմեզ, կը գործվեն, կը յանկուցանեն. այն
արցունքի կաթիլն զոր աչքդ կը հեղու
թշուառ անմեղութեան վերայ եւ այն ծափն
զոր խլեց քենէ արդարին յաղթանակն ա-
նիրաւին վերայ, փրկեցին զքեզ. եւ ան-
տովոր չէ պատահիլ թատրոնի սրահին եւ օթ-
եակներու մէջ դիմաց վերայ մերթ խորին
կարեկցութեան եւ խանդաղատանաց, մերթ
զայրոյթի, մերթ գոհ ծիծաղի նշաններ.
ահա՛ անհերքելի սպացոյց թէ թատրն
կը կրթէ: Այս կրթական զբօսանաց միջոցն
վաղ ծնունդ առաւ մեր մէջ, բայց,
աւաղ, շատ բաներու մէջ՝ կարծես՝ կը յե-
տադիմեմք. մի ժամանակ կայր ուր թատրոնի

սէրն ամէն սրտի մէջ էր. ազգային թատե-
րախաղեր զմիմեանս կը մըլէին. ժողովուրդն
խուռնամբօս սփ կ'առնոյր թատրոններու
դուռն. բայց անտարբերութիւնն յաջողեց
այս առաջին խանդին. հայկական ներկայա-
ցումներ եւ հետեւաբար Հայ թատրերգակ-
ներ չքաջաւերուեցան, եւ այսօր կը լսէ հա-
յախօս թատրն, մինչդեռ, ընդհակառակն,
պէտք էր որ հայ թատրեց թիւն շատնայր
հետզհետէ, եւ ամէն թաղ ունենայր իւր
թատերական սրահն: Դերասաններու խում-
բեր, անկարող սպրեւոյ այս քաղաքին մէջ,
կը թափառին քաղաքէ ի քաղաք: Պէտք է
սիրել թատրն, մանաւանդ պարկեշտ ու բա-
րոյալից թատրն որ զբօսուցիկ է միանգա-
մայն եւ հրահանգիչ:

ԺԲ

ԸՆԹԵՐՑԱՐԱՆՔ ԵՆ ԼՍԱՐԱՆՔ այնպիսի վայրեր են ուր ժողովուրդն կարէ օգտիւ անցնել իր պարապոյ ժամերէն մի քանին . գերազանցապէս օգտակար հաստատութիւններ են նոքա . որչափ շատ են դոքա՝ այն աստիճան ցոյց կուտան այն ժողովրդեան՝ յորում կան՝ բարոյական կացութեան աստիճանակէտն , այնքան կը ցուցնեն թէ այդ ժողովուրդը գիտէ տալ իւր պարապոյ վայրկեաններն ո՛չ այնպիսի իրաց որ կ'աւերեն՝ այլ այնպիսեաց որ կը շինեն , որպիսի է ընթեռնուլ եւ լսել մի օգտակար հրապարակախօսութիւն : Պէտք է որ խնդակցիմք մեր մէջ այս կրկին հաստատութեանց սկզբնաւորութեան վերայ . թաղեր հետզհետէ կ'ունենան իւրեանց ընթերցարանն ու լսարանն . բայց կատարելագործում պէտք է , եւ առ այս ընկերութիւններ քաջալերիչ : Ըստ Հերոզոտի Եգիպտացւոց մի հին թագաւորն , Յզիմանատիաս , մի զրատուն էր շինել տուած

— ծանօթ հնագոյն գրատունն ի պատմութեան — եւ ճակատն դնել տուած էր այս արձանագրութիւն « Դեղ հոգւոց » . զի ստուգիւ գիրքն կը բուժէ տկարութեանց մեծագոյնն — տգիտութիւնն . գիրքն մտքերու մէջ կը վառէ ճշմարտութեանց ջահն՝ վանելով նախապաշարումներու մահարոյր խաւարն . գիրքն կը բարձրացնէ ու կը վսեմացնէ զգացումներն . գիրքն մի խուրճ է կայծականց զոր մեր հոգւոյն կը մերձեցնեմք . մի գիրք յաճախ մի լաստ է փրկութեան որով կը գերծանի նա անտարբերութեան , անգիտութեան , անյուսութեան ծովուն մէջ անդնդասոյց լինելոյ վտանգէն : Մի էջ բանալ մի նոր հոգի բանալ է , հաղորդակցութեան մտնել է մի հոգւոյ հետ : Իմ վերայ միշտ այսպէս ազդած են գրքերն . թուած են ինձ մէն մի հոգիներ որոց ծալքերն են խորհրդաւոր այն էջերն զոր կը դարձնեմք եւ ոյք կը ծրարեն յինքեանս խոհեր եւ զգացումներ : Մտեանագիրք անչուչտ կը վերաբերին մարդկութեան ազնուագոյն մասին , եւ հոգին այլ մարդոյն ազնուագոյն տարրն է՝ լաւ ուրեմն , այդ էակք իւրեանց էութեան ազնուագոյն մասն , ամէնէն բարձր խորհուրդներն եւ ա-

մենէն ազնուական յոյզերն իւրեանց սրտին դրոշմել են այդ թերթերուն վերայ. եւ այլ եւս չիք խտիր միջոցի եւ ժամանակի. ահա կ'ունկնդրեմ Հոմերի երգոց, ահա ականջ կը դնեմ Պլատոնի խմաստախրութեանց, կը լսեմ զՏէքարդ որ կը ճառէ, կ'խմանամ զՌուսո որ կը հծծէ ինձ իւր խոստովանութիւնքն, զԾիկիէ որ արարչութեան հրաշալիքներն կը պարզէ ինձ եւ զլամարթին որ կը մերկանայ ինձ խորչերն իւր խորագգած մեծ հոգւոյն. նոցա ընկերութեան մէջ եմ, թէպէտ մինակ առանձինն. հոգիս նոցա հոգւոյն շփումն կը կրէ, եւ կը մեծնայ: Ո՛հ, գերագոյն ճշմարտութիւնք մի գրքի մէջ յայտնուեցան մարդոյն. ամէն քաղաքակրթութեան սկիզբն մի գիրք կայ. Հնդկաստան քեզ ցոյց կուտայ իւր Վեհան, Չինաստան իւր Քիւնկն, Պարսկաստան իւր Զենս-ալիեսան, Հրէաստան իւր Կսակարանն, Իսլամութիւնն իւր Գուրանն, նոր քաղաքակրթութիւնն իւր Աւեստարանն. — միշտ մի գիրք ոյր հաւատքին վերայ կը քայեն ազգերն. պէտք է բազմապատկել ընթերցարաններն, որպէս զի գործաւորն իսկ, երբ կը դառնայ մի համակ դնդերային վաստակէ, գայ մի դանկի դնով

— զի չկարէ ինքնին գնել մի հատոր — իւր թմրեալ միտքն զարթուցանել, սնունդ տալ նմա զի չթոշնի, որպէս զի ճշմարտութեան արեւուն կենսաւէտ ճաճանչն թափանցէ ժողովրդեան ամէն խաւերուն մէջ եւ արգասաւորէ առաքինութեան եւ խմաստութեան սերմերն որ ամենուրեք են՝ այլ կը փտին առանց արգասաւորող ջերմութեան:

Լսարանական հաստատութիւններն պէտք է շարունակել ու զարգացնել, որք մանաւանդ մասնաւոր հրասրոյր մի կ'առնուն երաժշտական մասովն որով կ'ընկերացնեմք բանախօսութիւնքն: Գիրքն կայ, բայց լսելն այլ մի այլ հաճոյք է. եւ յետոյ, այն որ կը խօսի՝ մի կամ երկու ժամու մէջ կը պարզէ մեզ թերեւս մի ամբողջ կեանքի ընթացման, խորհրդածութեան եւ ուսումնասիրութեան արդիւնք. եւ յետոյ, ամէն անհատական հոգի իւր սնհատականութեան դրոշմն ունի: Մի կէտ կայ, սակայն, զոր հարկ է նկատողութեան առնուլ. քիչեր յանձն կ'առնուն հրապարակախօսել. եւ այս թերեւս առ այն զի կը կարծեն թէ բանախօսն պարտի ունենալ պերճախօսական տաղանդ փայլուն կերպով

ներկայացնելոյ համար իւր մտածութիւնքն եւ ուսումնասիրութիւնքն. բայց այս մի հարկաւոր կէտ չէ, եւ եթէ այսպէս չհաւատայի՝ ես եւս չպիտի լշխէի ելնել յայս բեմ: Պէտք չէ որ այս պարագային մէջ ժողովուրդն այլ ձեւոյ մասին խստապահանջ լինի. մի պերճախօսական բեմ չէ այս, այլ դասախօսական, եթէ կը ներէք ինձ այս բառ եւ ինչպէս որ մեր Ռուսահայ եղբարք կ'անուանեն իւրեանց լսարանական բեմերն: Այն ատեն բանախօսէն ոչ այլ ինչ կը պահանջուի եթէ ոչ պայծառ ու կարգաւորեալ կերպով եւ ուղիղ ու պարզ լեզուաւ բացատրել եւ ընդլայնել իւր նիւթն. իւր նիւթն որ պարտի լինել ժողովրդեան անմիջական կերպով շահաւէտ մի ծանօթութիւն, որ անմիջական ազդեցութիւն ունենայ ժողովրդեան համոզմանց ու ընթացից վերայ, որ տարակոյսներու մէջ միւրոյս բերէ, հնաւանդ փտած նախապաշարումներ ի բաց քերէ, մի ճշմարիտ կանոն աւանդէ կենաց: Իբր այն, հետեւեալ նիւթերն կ'առաջարկեմ ապագայ ազգային բանախօսաց. — կենսաբանական եւ առողջարանական գիտելիք, բարոյական սկզբանց ու պարտուց ծանօթու-

թիւնք, քաղաքական եւ առտնին տնտեսութիւն, մեծ մարդոց վարքերն, ազգային եւ տիեզերական պատմութեան մեծ դիպաց իմաստասիրական բացատրութիւնն, գիւտերու պատմութիւնն, բնապատմական՝ բնագիտական՝ երկրաբանական ու երկնաբանական գիտելիք, ճամբորդութեանց պատմութիւն, ընկերաբանական տեսութիւնք, ժողովրդային դրագիտական գործոց վերլուծութիւնն ու բացատրութիւնն. — եւ ոչ թէ օղոյն մէջ ժամերով պոռոտախօս եւ մեծադորդ ունայն երկարաբանութիւնք: Ահա՛, ըստ իս, այս կերպ պէտք է հասկանալ լսարանն ու այսկերպ պէտք է որ հասկանայ բանախօսն իւր պարտքն ու պաշտօնն:

ԺԳ

Մի բան կայ որոյ առ մեզ տակաւին չէ հասկացուած օգտակարութիւնն իբր զբօսանք եւ իբր հրահանգ. այս բանն է ՄԱՐՄՆԱՄԱՐՁՆ. — մեր վարժարանաց մէջ իսկ դեռ շատ ցանցառակի մուտ գտած է. ի՞նչ կ'ըսեմ, ուր որ կայ այս փրկաւէտ մարզանքն՝ ճնողք ազդարարութիւն ազդարարութեան վերայ կը փութացնեն առ տնօրինութիւնն որպէսզի իւրեանց որդին տնօրինեալ համարուի այդ դասի հետեւելոյ պարտաւորութենէն: Ո՞վ կուրութիւն որ մերժել կուտաս զդեղ իբր զթոյն եւ բժիշկն համարել մի դահիճ: Բայց չհասկանամ դաստիարակութիւնն առանց մարմնամարզի. եթէ դաստիարակութեամբ կ'իմանանք մարդկային կարողութեանց մշակումն, միթէ մարմինն մարդկային կարողութիւններէն մին չ՞, կամ մանաւանդ, նոյն իսկ այն գործին որով կը գործէ հոգին: Հոգեկան կարողութիւններն կը մշակեմք եւ կը զարգացնեմք, իսկ մարմինն

կը թողումք բնութեան. լաւ, բնութիւնէ գիտէ իւր գործ, բայց պէտք է օգնել նմա փորձոյ տուած հրահանգներով, ուղղել զայն եւ զօրացնել նորա աշխատութիւնն: Երբ տկար է մարմինն, երբ չէ պատրաստուած կեանքի պատահականութեանց, խստութեանց ու վտանգաց, ի՞նչ օգուտ այն հմտութիւնք զորս կ'ամբարեմք մտաց մէջ. ո՞վ պիտի գործածէ զայնս. կ'աշխատեմք դիզել հարստութիւն, բայց անփոյթեմք հաստատուն եւ ամուր յօրինել պահարանն ուր կը դնեմք մեր գանձն ի պահեստ. մի յիմարութիւն է այս: Բաց աստի, նոյն իսկ այդ հարստութիւն չկարէ աճիլ որպէս կը փափաքեմք, երբ տկար է պահարանն. երբ տկար է մարմինն, նաեւ միտքն կը պակասի տոկունութենէ եւ կորովէ: — Շատ յիշուած է այս առած, «Առողջ միտք յառողջ մարմնի» եւ հին է. բայց լաւ չէ բմբռնուած. որովհետեւ տակաւին այնքան կը վախճանք մարմնամարզէ: Եւ հետեւաբար ամէն բանէ կը վախճանք. երկշոտ արարածներ եմք: Մեր երիտասարդութիւն տկարանձն է եւ յաճախ փոքրամարմին, եւ չկարէ տուկալ նաեւ մտաւորական մեծ ու հզօր աշխատութեանց.

մտքն շուտով կը յողնի: Կախ դուրս, մա-
րած աչեր, կոր քամակ, տկար ու հիւան-
դազին քալուածք, ահա սպտիկերն մեր ե-
րիտասարդաց շատերուն. աւաղ, մի տիեզծ
երիտասարդութիւն ունիմք, փոխանակ եւ-
րոսպական ազգերու առոյգ՝ կայտառ՝ զօ-
րեղ եւ հսկայ երիտասարդութեան: Մեր
իգական սեռն նոցա կանանց եւ աղջկանց
շատերուն քով մի ճգմուած ծաղիկ է որոյ
վերայ մարդ կը ցաւի:

Եւ ի՞նչ կը լինի մի այսպիսի ազգ. մարմ-
նոյ տկարութիւնն կ'արտադրէ տկարութիւն
հոգւոյ, եւ Ֆիզիքապէս ու բարոյապէս ան-
զօր արարածներ ի՞նչ բանի կարող են, —
եթէ ոչ գաւազանաւ հովուութեայ եւ, թըշ-
ուառութեան հողմոյն առջեւ ինկած թեթեւ
ունգ յարդի, ազիտից յաղէտս տարուբեր-
ութեայ: Հին Յոյներն լաւ հասկցած էին այս
ճշմարտութիւններն. ուստի եւ մարմնամար-
դի կարեւորութիւնն մեծ էր առ նոսա. պա-
տանեկան հասակի հրահանգաց անհրաժեշտ-
ներէն մին էր. յատուկ ժիւղնազ կոչուած
չէնքեր կային ուր երիտասարդք կ'երթային
ի մարզս՝ մերկամարմին եւ իւզազօծ. Սպար-
տայի մէջ Լիկուրգոս ստիպողական ըրած էր,

եւ կանայք իսկ, հակառակ իւրեանց սեռի
յատուկ համեստութեան զգացման, մարմնա-
մարդական փորձերու եւ վարժից կը մաս-
նակցէին որպէսզի առոյգ զաւակաց լինէին
մայրեր: Հրապարակական աշխարհախումբ
հանդիսից մէջ, որպիսիք էին Ողիւնպեան,
Նեւնեան, Պիւքեան եւ Իսրնեան կոչուած
խաղերն, մրցութիւնք կը լինէին, եւ զլիա-
ւորքն էին մարմնոյ ձիւնութեան եւ շօ-
րութեան փորձեր. վազք, արդնընկեցութիւն,
զօտէ կուլ, բռնամարտիկ մրցութիւն եւ այլք,
եւ յաղթողն կը սրակուէր դափնեայ սրա-
կաւ Յունաստանի չորս ծայրերէն եկող ան-
համար բազմութեան առջեւ, բանաստեղծք
կ'երգէին զնա, եւ ծնողք հպարտ էին եւ
կ'արտասուէին առ խնդի: Անշուշտ այս մար-
մնական մարզք տուին Յունաց այն շնորհալից
ձեւերն ընդ որս կը զարմանամք տակաւին
նոցա արձաններուն ու քանդակներուն եւ
մինչեւ իսկ իւրեանց յաջորդ արդի բաղիխար-
ներուն վերայ, — զի մարմնամարզք նպաս-
տաւոր են այնքան ուժոյ որքան բարեշնոր-
հութեան մարմնոյ. — եւ երբ մի օր Պարս-
կաստան, դրեթէ Արեւելք ողջոյն, յոտն ե-
լաւ թափուելոյ Յունաստանի վերայ եւ ո-

դողելոյ զայն մարդկային ջրհեղեղաւ, Յու-
նաստանի ափ մի ժողովուրդն ցրուեց այդ
մարդկային հեղեղն իբր գիողի դիր եւ տար,
եւ գոռոզն ֆսերքսէս, որ կարծեւ էր իւր
բանակաց տեսլեամբն միայն պակուցանել եւ
անձնատուր ընել գՅոյնս, մի ձկնորսի նաւա-
կով մագապուր կը զերծանէր յԱսիա: — Կան
ստուգիւ այնպիսի արհեստներ ուր ամենօր-
եայ աշխատութիւնք արդէն դնդերային մեծ
գործունէութիւն մի կը պահանջեն եւ նպաս-
տաւոր են ջղերու զարգացման ու զօրու-
թեան, ինչպէս նաւավարութիւն, ինչպէս
դարբնութիւն. բայց յաճախ նոյն իսկ մարմ-
նական աշխատութիւն պահանջող արուեստք
մարմնոյ այս կամ այն մասերն գործունէու-
թեան մէջ կը դնեն եւ այլք կը մնան անգործ
կամ աննպաստ գրից մէջ, որպէս կոչկակարն՝
որ բազուկներն կը գործածէ, բայց, նստուկ
է, ոտքերն անշարժ կը բռնէ եւ կռնակն՝
ծռած. իսկ յւրիշներ, որք մտաւորական են
մանաւանդ, քիչ առիթ կը թողուն անդա-
մոց եւ մարմնոյ այլ մասանց գործունէու-
թեան. ուստի նոցա եւ սոցա հետ զբազոզ-
ներու համար անհրաժեշտ հարկ մի է մարմ-
նամարզն որ խանգարեալ ներդաշնակութիւնն

կը վերահաստատէ եւ կազդուրում ու հա-
ճոյք կուտայ: Թողլով որ վարժարանաց տե-
սուչք դաստիարակութեան գործոյն այս
կարեւոր թերին լրացնեն մեր մանուկներուն
համար, փափաքելի է որ շափահասք մար-
մնամարզական ընկերութիւններ կազմեն, եւ,
մի կարող ուսուցչի հրահանգաց ու առաջնոր-
դութեան ներքեւ, իւրեանց զբօսանաց ժա-
մերէն մի քանին, մի մասնաւոր սրահի մէջ,
մարմնաշարժութեան փորձերու նուիրեն.
չատ դիւրին գործ է այս եւ շատ քիչ ծա-
խուց կարօտ. պիտի զբօսնուն օգտուելով,
զօրանալով, եւ այս օգուտն՝ չպիտի ուշա-
նան զգալ զայն:

ԺԴ.

Մի մարմնամարդական զբօսանք է նաև ՊԱՐՆ: Չեմ այն խստաբարոյ մարդոցմէ որք կը դատասպարտեն պարն իբր անբարոյական: Անբարոյականութիւնն մարդոց կրթութեան մէջ կը լինի, եւ երբ կայ հոն՝ այն ատեն կարեն ամէն բանի մէջ զնել զայն, նոյն իսկ ամէնէն սուրբ բաներու մէջ: Երբ երկուստեք, պարողք եւ պարուհիք, բարեկիրթ են, երբ իւրեանց պարտուց ու պատշաճութեան գիտակցութիւնն ունին, այն ատեն երիտասարդներու համար պարն ներելի եւ անմեղ զբօսանք մի է, որ կը զուարճացնէ երիտասարդութիւնն, իբր գեղարուեստ՝ (զի պարն մի գեղարուեստ է) կը կրթէ ճաշակն ու ձեւերու եւ շարժուածոց շնորհ ու զիւրաթեքութիւն կ'ընծայէ, եւ իբր մարմնամարդ՝ կը նպաստէ մարմնոյն զարգացման: Պարն, մանաւանդ ընտանեկան ակումբներու մէջ եւ ծնողներու աչաց տակ, ոչ մի վնաս չունի. լաւ կրթէ որդիդ, լաւ կրթէ աղջիկդ,

եւ մի՛ այլեւս վախնար. իսկ թէ չէ՛ կրթւած՝ քախտի իսկ երբ մի սենեկի մէջ կը փակես զայն եւ դուռն կ'աղխես իւր վերայէն: այդ միայնութիւնն իսկ վտանգաւոր է: Բաց աստի, հեռի պահել երիտասարդութիւնն, ամուսնութենէ յառաջ, ամէն որ եւ է սեռային յարաբերութենէ, մի վնասակար գրութիւն է որ տրամագծապէս հակառակ արդիւնքն կ'արտադրէ. բնութիւնն կ'ապստամբի, կրքերն կը զայրանան, եւ զի զլացար նոցա մի չափաւոր՝ օրինաւոր ճարակ, կը կոխեն կ'անցնին ամէն սահման եւ ապօրինաւորութեան մէջ իւրեանց յագուրդ կը հայթայթեն, մի ցաւալի վրէժ լուծելով անխոհեմ ծնողներէ որք մուցել էին թէ ինքեանք եւս երիտասարդ են եղած: Հարկ չէ ինձ ցուցնել թէ պարն մի բնական պէտք իսկ է մարդկային բնութեան համար, ներքին յոյզերու եւ զգացմանց արդիւնք, նոցա բացատրութիւնն: Ինչպէս խօսքով եւ երգով, նոյնպէս եւ այդ մարմնոց ծածանումներով, այդ ոստիւններով ու կայթիւններով կը բացատրէ մարդ իւր ուրախութիւնն՝ եւս անդն եւ մինչեւ տրտմութիւնն, զի երբեմն նաև մեռելոց պարեր կային: Ահա էր պարն

այնքան հին է որչափ մարդկութիւն, եւ նոյն իսկ վայրենային տարրական ընկերութիւնք իւրեանց պարերն ունին, վայրագ իւրեանց բարուց պէս. եւ ի հնումն Հնդկաց, Եգիպտացւոց, Հրէից, Յունաց, Հռովմայեցւոց մէջ պարն կցորդուած էր կրօնական արարողութեանց: Պարն չկարեմք բառնալ եւ ոչ իսկ պարտիմք. այլ պէտք է որ ազնուացնեմք զայն, զի բարուց ազնուացման եւ քաղաքակրթութեան հետ ազնուացած է եւ այս. հին՝ լիախնարուց պէտք է որ փոխանակեն եւրոպական նոր պարք, աւելի գեղեցկագիտական, աւելի շնորհալից, որք արդէն սկսած են ընդհանրանալ մեր մէջ:

ԺԵ

Մարմնամարզական զբօսանաց հետ կը կապուին նաեւ ՉիԱՐՇԱԻՆ ու ՆԱԻԱՐՇԱԻՆ, երկու մարզանք որոց թերեւս անունէն իսկ կը դողամք մեք, հայ երիտասարդքս, վասն զի, ըսի արդէն, շատ վախկոտ եմք: Մանաւանդ մեռնելէ շատ կը վախնամք. անշուշտ, պէտք է վախնալ, մարդ երկու անգամ աշխարհ չգայ. մահատիթ պարագայներէ պէտք է զգուշանալ, բայց գիտէ՞ք որ մեռնելէ շատ վախցող մարդն՝ մի օր այլ վախէն կը մեռնի: Յաճախ պատահած եմք դաշտերու մէջ ասիպարանոց՝ բոցաշունչ ուռնդներով նժոյգներու վերայ հեծեալ վայելչակազմ Եւրոպացւոց, որոց մէջ նաեւ կիներ կան սեւ երկարատուուն չրջազգեստով, երկայն առնական գլխարկ ի գլուխ, եւ երկնակապոյտ շղարչն ի հով, որք կը սուրան կ'անցնին օդաթոխ սրարչաւ, եւ մեք խոչոր ապուշ աչեր բացած կը կենամք՝ վարն՝ կը նայիմք նոցա ետեւէն, այր երիտասարդք զարմանալով կ'նոջ

իսկ վերայ: Իսկ պէտք է Գատրգիւղ երթալ (զի հոն տեսած եմ միայն) եւ Մօտայի սարն նստած (նստած զի ուրիշ բանի կարող չեմք) դիտել Անգղիական նաւամրցիկ Քլիւպի անդամոց ծովուն վերայ ըրած զմայլելի փորձերն: Նեղ ու երկայն, տեսակ տեսակ, շնորհալից, բանաստեղծական, քմահաճ ձեւերով՝ գրեթէ ջուրին հաւսար մակոյկներու մէջ նստած՝ թեթեւ հագուստներով՝ երբեմն միայն Ֆլանէլ շապկով՝ մերկաբազուկ՝ շատ անգամ մէն միայնակ եւ դուն ուրեք կրկին՝ երիտասարդներ ուժգին կը թիւփարեն իրարու ետեւէ փրփրելով ծովուն ալիքներն, նետի պէս սուրալով ալեաց երեսէն, ելեւել ընելով մի զմիով զիրեար յետս թողլոյ համար. ծովուն վերայ կը հնչեն իւրեանց գոռ ձայներն զիրեար խրախուսելոյ եւ յետամնացն ծաղրելոյ համար: Ո՛հ, գեղեցիկ է, անմեղ, բանաստեղծական, արիական, այնպէս՝ երկու անհունութեանց մէջտեղ՝ ալեաց մէջէն արշաւել թողլով մազերն զեփիւռին, զեղեցիկ է եւ նաեւ կենսաւէտ: Ուստի եւ երբ նաւահանգիստ կը դառնան ու զոյգ զոյգ գրկած այն բարեձեւ՝ նրբին մակոյկներն կը տեղաւորեն նա-

ւարանին մէջ, ի՞նչ աշխոյժ են, ի՞նչ նոր առոյգութիւն մ'առեր են. իւրեանց կուրծքն ընդլայնուած է գոգցես այն մաքուր ու ազատ օդովն որ ծովուն վերայ կը շնչուի, եւ իւրեանց անառուտ ու ջլապինդ բազկաց ոյժն միայն փորձողն զիտէ: Նոյն պահուն մեր երիտասարդք մի գինետան կամ զբօսարանի մէջ, ծխախոտոյ մուխով, մարդոց շունչով եւ այլ գոլորշիներով ապականուած մի մթնոլորտի մէջ, սեղմուած նստած են եւ կ'զբաղին ի՞նչ բանի. — զինքեանս անբանացնելոյ, աղքատացնելոյ, քայքայելոյ: Պէտք է փոխել զբօսանքներն եւ ընտրել զայնս որք զմարդ կը մեծցնեն, պայծառամիտ, ցօրեղ եւ քաջ կ'ընեն: Ամէն հաշիւ ընելով, այսպիսիք նոյն իսկ ծախուց տեսութեամբ տնտեսագիտական են, զի սոքա անդունդ չեն, ինչպէս խաղն ու տուփին, գլուխ չեն դարձներ: Եւ գէթ մեր հարուստ պարոններն այս պատրուակն չունին, քանի որ ոսկիներ կը թափեն... աղբեւաց մէջ:

ԺԶ

Մնաց ինձ խօսել մի այլ զբօսանքի վերայ եւ առաջարկել եւ զայն: Այս զբօսանքն է ՈՐՍՈՐԴՈՒԹԻՒՆ: Թէպէտ կենդանիներ, մանաւանդ թռչուններ որք կարծես մարդոյն համար երկնաթեւ եւ անհաստատ տենչերու սիրուն խորհրդանշաններն են, սպաննելոյ կողմնակից չեմ, սակայն, թող որ ուզեմք չուզեմք ամէնքս ակամայ կը քաջալերեմք կենդանասպանութիւնն՝ քանի որ կենդանեաց միսն կը գործածեմք իբր սնունդ, իւր այլ առաւելութեանցն համար որսորդութիւնն կը յարգեմ, միայն թէ կրնայ որսորդն գէթ անմեղ թռչնիկներն խնայել եւ աւելի առատ կերակուր խոստացող երէցոց ըլլալ ի խնդիր:

Արդէն որսոց զբօսանք միշտ սիրելի եղած են, եւ թագաւորք երէցներ ունէին ցանկապատ ուր մեծ պատրաստութեամբ կ'ելնէին յորս, «ի զբօսանս որսոց» ինչպէս կը գրեն Հայ թագաւորաց համար

մեր նախնի պատմագիրք: Բնութեան հետ ապրիլ մ'է, անտառաց թաւուտներու խորն մխիլ, վեր ելնել մագլել բլուրներէ՝ լեռներէ, դիտել քննել՝ ականջ տալ ուշադիր չորս կողմէ եկած ձայներուն որք յաճախ երէին չեն եւ որք, բիւր ներդաշնակ ձայներ բնութեան, կը թափանցեն որսորդին ականջէն, է զի՝ յոգնած՝ վար դնել հրացանն ու նորա բնոյն վերայ հազչեցնել վայրիկ մի գլուխն ի քուն անոյշ, շուներն՝ հաւատարիմ պաշտօնեայներ՝ որք կ'երթեւեկեն աշխոյժ՝ հետաքնին ցռուկ ի գետին, զուարճալի պատրանք, խաբուած յոյս՝ երբ ունայն՝ ականջ ի կախ՝ ետ կը դառնայ բարակն որսական կամ կը բերէ տարբեր ինչ յայնմանէ գոր կը սպասէիր, այս ամենայն օրն կը հիւսէ անոյշ տպաւորութիւններով, հեշտ ու առողջ վայելումներով, քաղցր յոյգերով: Բաց աստի, գէնքի վարժուելոյ պէտքն ունիմք. մի դատարկ ատրճանակի տեսիլն կը դողացնէ շատերն ի մէջ, եւ կեանքի մէջ քանի՛ դէպքեր կը պատահին ուր մի հրագէն գործածելոյ ընկ սովորութիւն ունենալն կրնայ զմեզ մեծ վտանգներէ փրկել եւ արիութիւն տալ մեզ մեր կենաց՝ մեր պատուոյն՝ մեր ընչից դէմ

անիրաւ յարձակում մի անդէն յետս վանե-
լոյ : Օ՛հ, փափաքելի է որ զինուց ձայնն
դադրի աշխարհէ , ոչ եւս գնտալին արեան
ծարաւի պատուէ օդն չչելով եւ սուրն՝ դժո-
խային շողիւններ արձակելով՝ ճօճայ միջոցին
մէջ , փափաքելի է որ երկաթն գործածուի
միայն կենաց դիւրութիւն տուող օգտաւէտ
գործիներու եւ անօթոց ձուլման . սակայն ,
մինչեւ հասնի այս ըզձալի դարն , փիլիսո-
փայից իտէալն եւ մարդկութեան ըզձակէտն ,
նոյն իսկ սրոյ թշնամին սրոյ պիտի դիմէ
մերթ ընդ մերթ անձին ի պաշտպանութիւն .
ցորչափ իւր շուրջն զինաթափ չեն այլք ,
անգէտ լինել զինու՝ տկար լինել է . առաջին
անպիտան աւազակին որ մութին մէջ կը յար-
ձակի վերադ՝ գերին ես , ստիպուած ես
գլուխդ ծռել որչափ որ բարձր ու վեհ ամ-
բառնայ այն ուրիշ առիթներու մէջ եւ այլոց
առջեւ : Այս կեանքն զոր խլել կուգայ մի
հուղկահար , մի մարդադէմ գազան , ես զայն
Հայրենիքիս , Մարդկութեան կը պարտիմ ,
եւ սակայն Հայրենիքն ու Մարդկութիւնն
այլ անվախ ու վեհ հոգիներու պէտք ունի ,
ոչ թէ մուկերու որոց բոլոր արիութիւնն
կայանայ՝ կատուին ի տեսիլ՝ ամէնէն մտաւոր

ծակն փախչիլ կարենալոյ մէջ : Օրինակն թե-
րեւս ազնիւ չէ , բայց բացատրիչ է :

ԺԷ

Տիկնայք եւ տեարք , ահաւասիկ այն գլխա-
ւոր զբօսանքներն զոր բարոյական , ազնիւ ,
փրկաւէտ , կազդուրիչ , շինիչ եւ ըստ ամե-
նայնի համապատասխանող կը հաւատամ զբօ-
սանաց նպատակին . այս զբօսանաց մէջ է
զի միտքն , է զի մարմինն եւ է զի երկօքին
ի միասին իւրեանց գործունէութեան խտրութ
եւ հեշտ ձարակ մի կը գտնեն եւ աշխատու-
թեան յառաջ բերած յոգնութիւնն ու տկա-
րութիւնն կը դարմանեն եւ կ'ապահովեն
մարդկային անհատին եւ ազգաց ամբողջա-
կան՝ բոլորամասնեայ կեանքն ու աճումնն :

Բայց չեմ կարող վերջացնել լսօսքս առանց
ձեր ուշադրութեան ներկայացնելոյ այս կէտ ,
զոր անշուշտ ձեր մէջէն նոքա որ ընտանեաց
գլուխ եղած են՝ քան զիս լաւ գիտեն , թէ ըն-
տանեկան՝ ԱՄՈՒՄՆԱԿԱՆ ԿԵԱՆՔՆ , ընտանի

յարկն , ինքնին միայն , իւր մէջ կը բովանդակէ շատ մի սուրբ ու անխտոն զուարճութիւններ , զբօսանք եւ սփոփանք զոր բնութիւնն այդ պարտքի կատարման մէջ դրած պահած է : Իւր ընտանեաց ծոցոյն մէջ մարդ կը հանգչի . ծնողներ տեսած եմ , դեռ երիտասարդ , որք ամուսնութենէ յառաջ այնքան անյազ էին զուարճութեան , ամէն պարահանդիսի մէջ էին , ամէն ակումբի կը վազէին , եւ սակայն երբ ամուսնացան եւ զաւակներ հասան , ամիոփուեցան , քաշուեցան , արտաքին զուարճութեանց փափաքն անցաւ : Թէ հարցնես նոցա « Ի՞նչ կ'ընէք , ինչո՞ւ դուրս չէք ելներ » , — « Ի՞նչ ընենք , կը պատասխանեն , տղաքներով կ'զբօսնունք : » Այո , ճշմարիտ է այս բառ . տղաքներն տան թռչուններն եւ , տան մէջ գարունն ու ծաղիկներն եւ : Նոցա շողփաղփին , անմեղ ժպիտն ու անզուսպ ծիծաղքն , խելացի աչերն ու անբիծ կաթնաթոյր ճակատն կը զուարթացնեն ամէնէն տխուր սիրտն եւ ամէնէն մթին ճակատու կնճիռքն կը փարատեն . նոցա անմեղութիւնն հրահանգիչ է . հայրն ու մայրն այդ պզտիկ էակներէն կը սովորին երջանիկ՝ գորովասիրտ՝ հեռատես՝ խնամատ լինել , եւ կարեկցու-

թեամբ նայիլ նոցա վերայ որք , ընտանեկան կեանքի սրբավայրէն դուրս , նուաստացուցիչ եւ մարդասպան հաճոյքներու եւ սպա-կանալից ընկերութեանց մէջ դիւր եւ զբօս կը խնդրեն . . . :

Երես 53. — Բանախօսութեանս հեղինակն անձամբ փորձառու եղաւ այն խոր սպաւորութեան եւ գործնական արդեանց զոր յառաջ կը բերէ ժողովրդեան վերայ մի օգտակար նիւթոյ մասին եղած պարզ ու պայծառ բանախօսութիւն: Սամաթիացիք ոչ միայն եռանդագին համակրութեամբ շրջապատեցին բանախօսն, այլ եւ նոյն վայրկենէն շատեր գործնական փորձեր տուին իւրեանց կրած սպաւորութեան եւ ստացած համոզմանց՝ իսկոյն հրաժարելով ծխելէ եւ խմելէ, եւ, որպէս կը տեսնուեալ, անտի եւ այսր կը շարունակեն բազումք իւրեանց ուխտին մէջ: Խօսքն ամենակարող է. մտքերու եւ սրտերու վեհագեան է նա: Փափաքելի է որ կարողագոյն լեզուներ, խորագոյն հմտութեամբ զինեալ, յասպարէզ գան խօսիլ ժողովրդեան հետ իւր պիտոյից, իւր շահուց եւ իւր պարտուց վերայ: Ժողովուրդն ծարաւի է ճշմարտութեան, պէտք է յագեցնել զայն: Միտք, գաղափար պէտք է շինել, եւ ապա ժողովրդէն թշմարիտ շարժում եւ դէպ յառաջդիմութիւն անվերէպ քայլեր սպասել:

Երես 56. — Էլիզէ Ռըքլիւ, իւր Նոր Տիեզերական Աշխարհագրութեան մէջ, յԱնգղիա տղայոց ֆիզիքական կրթութեան վերայ խօսելով կ'ըսէ. «Եթէ Անգղիա Եւրոպիոյ այն աշխարհն է ուր ամէնէն աւելի յաջողութեամբ զբաղած են այլեւայլ ցեղէ կենդանիներ մեծցնելոյ եւ յառաջ բերելոյ, նաեւ այն աշխարհն է ուր մանկան ֆիզիքական դաստիարակութիւնն ամէնէն աւելի հանձարով եւ բնութեան յարգանօք ի գործ կը դրուի, այնպէս որ մանուկն կարենայ աճիլ զօրութեամբ եւ գե-

ղեցկութեամբ : Քիչ անզղիացի պեպիներ (երխայներ) կան որք զմայելի չլինին : Դժբախտաբար թշուառութիւն շուտով կը խամրէ ի նոցանէ շատերուն դէմքն, քայց, նոցա մէջ որք բախտի առանձնաշնորհութիւնն ունին , քանիններ կը բռնեն իւրեանց տղայութեան խոստումն սքանչելի երիտասարդներ դառնալով... : Նոցա դաստիարակութեան մէջ, ամէն բան ի հաշիւ առնուած է նայուածքին աւելի հանդարտութիւն, զնդերաց աւելի սլժ, կամաց աւելի կորով տալոյ համար : Ենորհիւ այսպիսի հրահանգաց, այս մարդիկ կ'ուսնին ամէն առթի մէջ վստահիլ յինքեանս . կ'արհամարհեն հիւանդութիւնն, յոգնութիւնն ու վստանքն . չկախնան ոչ բացօթեայ մնալէ, ոչ ցրտէ, ոչ տաքէ . եթէ մէն միայնակ մնան անապասի մէջ կամ ովկէանու վերայ , ոչինչ նուազ իբրեւ կողմնացոյց կը պահեն իւրեանց անկրելի կամքն, եւ, ցորչափ իւրեանց գործն չէ աւարտած , իւրեանց աչքին ոչ ծնողը կ'երեւի, ոչ բարեկամ, ոչ այն մեծ քաղաքներն յորս այնքան հեշտ է կեանքն : Քիտակից իւրեանց զօրութեան , կ'արհամարհեն նենգութիւնն, որ տկարաց հնարքն է . չստեն բնաւ, խոփտաբար կ'ըսեն ճշմարտութիւնն, նոյն իսկ երբ վնաս բերէ իւրեանց անձին : :

Սրեւ 63. — Հայաստանի քաղաքաց մէջ՝ բարեբախտաբար՝ ծիարշաւն ժողովրդեան սիրելի զբօսանքներէն մին է : Կիրակէ կամ տօնական օրեր Հայ կտրիճներ՝ սօս երիվարաց վերայ հեծած՝ ընդարձակ ասպարիզի մէջ ձեռիտ կը խաղան շրջապատուած արանց եւ կանանց անհամար բազմութենէ որք պարտալն կը ծաղրեն եւ կը խրախուսեն յաղթողն, որպէս կը պատմէ Հ. Գ. Մուանձեանց իւր Մանամայի մէջ :

Վ Ր Ի Պ Ա Կ Ք



Էջ	Տող	Սխալ	Ուղիղ
10	25	խմացականու	խմացական ու
32	6	կը ջլատին	կը ջլատեն
32	7	պարտեն	պարտին
42	22	օրաթիօն	օրաթ օրիօն

15000

ՀՀ Ազգային գրադարան



NL0786495

ՀՀ Ազգային գրադարան



NL0786496

I

585
586

Հ Ե Ղ Ի Ն Ա Կ Ի

ՈՒՐԻՇ ՀՐԱՏԱՐԱԿ ՈՒԹԻՒՆՔՆ



ԼԱՐՔՆԵՐ «ԲԱՆԵ ՀՈՒՍԱՏԱԶՈՅ ՈՒՐՈՒՔ», Թարգմ.
(սպասում).

ԱՌԱՋԻՆ ՏԵՐԵՔ, ՔԵՐՊՈՒՄԸ, ՄԱՆՆ ՍԱԼԻՄՏԱՅ, ՃՈՒՖ,
ԱԿՄԵՍՅՈՒՄ, ՅԱՆԵՂՈՒՄ. ԳԻՆ 2 ՖՈՒՍԻՖ.

ԵՐԿՈՒ ԲԱՆԱԾՈՒՄԹԻՒՆՔ. Ս. ԹՈՒԱՆՈՒՐԻՆ ԵՆ ԳՈՐ.
Բ. ԳԵՂԵՂԻԿՆ ԵՆ ԳԵՂԱՐՈՒՆԵՍՏ. ԳԻՆ 5 ԳՈՒՆԵԿԱՆ